

台湾海防并 开山日记

罗大春

文硕阁

wenshuoge.com

目录

关于我们	3
台湾海防并开山日记	5
附录	36
后记	46
本书正文及附录索引	48

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

台湾海防并开山日记

同治十三年（甲戌）——是年，为计偕之岁。闽中例，必以三、四官轮船载举人莅天津；而每岁春、冬二季，凡官船之在外者，又必调集一合搜之：故星使以书求商校阅之期于余。盖一经北上，必迟至四、五月乃获旋闽。余定以是月（三月）十五、六、七之日，会阅于福州五虎口之白竿塘洋面。

既与星使约，随将署中事，以次部署讫。十一日，发自泉州，兼程行。

十四日，抵省。

十六日，卯刻，余驾「扬武」船率「万年清」、「伏波」、「安澜」、「湄云」、「靖远」、「振威」、「长胜」、「海东云」、「福星」、「济安」等十船，传令升后桅三角镶蓝旗，令各坚明约束，备操演也；次升后桅三角黄色龙旗，诸船以次升旗应，令起旋行也。辰初，抵白竿塘操所。后桅升三角黄色小龙旗，各船升旗应之，令扬帆也。升三角黄色小龙旗兼长方大白旗，各船升旗应之，令收帆也。升小方红旗兼长方红旗，操枪炮也。升三角镶红、蓝令旗兼长方五色旗，令收队停操半时也。须臾，头桅升长方五色旗，各船升旗应之，令开操也。头桅升长方大红旗，各船升旗应之，令操大炮也。头桅升长方黑旗，各船升旗应之，令操回合也。头桅升长方白旗，各船升旗应之，操救火也。后桅升四方小红旗，各船升旗应之，令操洋枪也。后桅升长方三色旗，各船升旗应之，令操舢板也。后桅升三角小龙旗兼三角镶红、蓝令旗，各船升旗应之，令去舟登陆而操也。既演英、法两国洋枪阵法讫，时傍晚矣；乃升「令」字旗，收队旋舟。

十七日，黎明，升「令」字旗，各船火器兵登岸打靶；历卯至申，乃毕。适暴风大作，谕管驾官各慎乃船；余亦登「扬武」。

是夜，风稍息；次早，转甚。余以舟行大海，暴风骤雨，事所时有；若必波恬浪静而后展轮扬帆，反是束手矣。因令各船斗风开驶。自镇海至白竿塘，计程约五十余里；于时东南风锐甚，各船去顺就逆，履险如夷。惟「湄云」、「福星」二船身长而底锐，若不胜其难者也；心颇忧之。卒皆无恙。

二十五日，得制军书，以台湾彰化奸民廖有富揭竿为乱，议发兵往捕治之。余拟以福靖前营戴总兵德祥、福靖右营王游击开俊率所部往，并咨调官轮船诣泉之崇武口载两营弁勇行；盖与彰化对渡也。因上制军书论廖有富事，语连及内山；其略曰：『二月之杪，闻台湾官军已至犁头店，步步为营，偪压贼巢。正在约期进捣，三月六日之夜，廖匪率其党倾巢遁入内山。昔漳浦蓝鹿洲先生论平台善后事宜有曰：「能使生番化为熟番、熟番化为民人，而全台不久安长治，吾不信也」！顾或者疑其地荒远穷僻，有其地不足以赋税、有其人不足以抚绥，不如因而置之，俾自若其天

转，可为后面屏蔽。余以为不然。两间气运日开，从古不知名之国，今且经数译而通中国，集于海滨，相为市易。矧前山久入版图，昔之熟番，亦犹今之生番；岂昔之生者可以熟，今之生者独不可熟之乎！设非廖匪逸入，犹自有说。如果逸入其中，番人居然窝之、留之，则捕盗之举，本不容已；问罪之师，亦正有名。天下之人不能疑为无故而开边衅，以渐招致其人、疆理其地，约束而教训之；十年以后，其地未必不可贡赋，其人未必不可劝惩。是东瀛方千余里、一大洲之上，无一夫一妇、一草一木不在圣朝覆帔之中，而匪徒逋逃之藪绝矣。不但此也，彼夫日本、荷兰之类虎视眈眈，海波相属；生番纵不生心，安保此类之不默诱潜煽！其所可虑，尚有在逃入野番之外。此番匪迹诚窜其间，是殆天以机遇与我也。贤者其有意乎？与沈幼丹星使及葆芝岑方伯书，并附论及此。

二十七日，风闻日本国以往岁琉球商船于台南后山遭风，为牡丹社生番杀惨、劫夺几尽；将起兵问罪。或云兵船已次琅■〈王乔〉登岸；正遣人谍探。

四月四日，得制军五百里羽檄及书，以日本违约，称兵台南番境，意殊叵测；请练制兵三营、募勇一营，以为先事之防。目今长城之倚，不能不以此事推袁。纵志切循陔，固当力为朝廷谋借寇，祇听前途消息，便请移镇厦门云云——盖知余已有乞养之举也。余思东南半壁承平已将十年，旧部能征惯战之士，多半归隐田亩；否亦散之四方。是夜，亟修书遣人往江南招致曾历战阵健儿三数百人；一面驰书覆制军，告以部署大略。初十日以后，搜简士伍、缮治甲兵，壹志为防海计。先是，王补帆中丞应诏言事，原有「化兵为勇」之议。得旨报可，商其纲领于余。余为条定八则上之两院，事寝未行。至是，始举以为言。余就前议，因时势之宜，略润色之，定练全闽制兵为十二营；制军如所议入告。

十九日，得三月二十九日谕：『日本窥伺番境情形，着沈葆楨不动声色察看。应如何调拨兵勇之处，着会商文煜、李鹤年及提督罗大春等酌量调拨。至生番如可开禁，即设法抚绥驾驭，俾为我用；藉卫地方，以免外国侵越。并着沈葆楨酌度情形，与文煜、李鹤年、罗大春等会商请旨办理』等因。

二十二日，准沈星使咨，请相同渡会筹一切——盖已经专词入告。缘朝廷以李制军事务较繁，不能离省，令幼帅以「巡阅为名，前往相机筹办。幼帅于得旨后，条陈四事：一曰联外交。大概谓倭奴狡谲异常，其称兵也，西人斥其非；彼则以商诸中国，业经见许为词。必将递次洋船遭风各案，摘要照各国领事，听其公评；或愬于公论，敛兵而退。一曰储利器。议者咸谓：日本非西洋之比。然有明中叶全盛之时，萃俞、戚、谭、刘之将才，竭苏、浙、闽、粤之兵力，尚数十年而后定；不可谓非劲敌。其陆战，虽西人亦惮之。又窥中国器械之未精，兼恃美国暗中之资助；且有铁甲船二号，以破寻常轮船，绰绰有余。今非购铁船、制水雷、备各种洋枪并其合膛之子、洋煤、洋火药、合膛之开花弹、火龙、火箭之类，不为功。乘此军务未明，尚可为牖户绸缪之计；迟则无及矣。一曰储人才。盖调余及籍隶广东之前署台

湾道黎君兆棠并共事日久之梁礼堂主政鸣谦也。一日通消息。则拟由福州陆路至厦门、由厦门水路至台湾，制电线也。星使既定期启行，并疏荐前陕西布政使林颖叔方伯，以稽查船政为名，察看海口情形，以固省垣门户。船政工程，则以内阁中书衔莆田学训导吴君仲翔提调；增募福靖新后一营，仍归驻厂管带福靖后营之副将王正道统带。附片以船政总监工之广东候补道叶君文澜可胜采办军火之任。而铁甲船、水雷诸具，颇为西洋所珍秘；拟调前船政监督日意格。适该洋员由上海来，与论日本事宜，多中窾要；因奏明挈之东行。

二十四日以后，各路谍禀：以日本来战船七，驻台湾南路之琅■〈王乔〉；倭官为海军中尉，姓大泽、名正衡。进兵生番社口，立营垒中。有统领调度官为陆军中将军，姓西乡、名从道；又一海军少将兼海军大丞，姓赤、名松。初五、六等日迺围攻番社，番稍有退入者，倭尾之而进。又谍云：倭奴数千人驻琅■〈王乔〉山巅，斫木为城。十八日，分三路进攻：一由风港、一由石门、一由四重溪；每（路）约五、六百人。生番不能拒敌，一哄而散。倭据牡丹社，而毁高士佛社、加芝来社、竹仔社；并有攻龟仔角社之说。海岸约屯兵二千余人，闻海口尚有三轮船云。

二十七日，得四月初六日寄谕：『前据总理各国事务衙门奏：日本兵船现泊厦门，声称借地操兵。并据英国使臣及南、北洋大臣咨报：该国有事台湾生番，当派沈葆楨并着福建布政使潘蔚帮同筹划；会商文煜、李鹤年及提督罗大春等酌量情形，相机办理。现在潘蔚行抵何处？着张树声催令兼程前进』等因。

二十八日，沈星使会制军、将军奏报，以五月朔日偕潘炜如方伯乘「安澜」、「飞云」、「伏波」三船东渡；并附片请增购里明东枪万五千杆、飞轮炮十尊，并雇外国水陆将弁各十人以为教习。

（五月）十三日，得制军六百里公牒，令余克期东渡，勇亦缓募。同日，接沈星使书，以嗣得大府函，拟仍请旌旆东行。北路之苏澳为全台精华所聚，又民番杂处，久为彼族垂涎；非才堪独当一面如足下，正恐未易措手。兹且议以节钺坐镇苏澳，目前既杜绝彼族觊觎之谋，将来亦足招徕群番化生为熟。今特派轮船奉迎大纛来台，面罄一切；初十外，更派一船往载部众直赴北路。贵部能以若干营行，幸自酌之！日内已有此意疏陈矣。

十四日，读制军书，语与星使同；内地防务，以嘱孙镇开华。余既忝提陆路军事，则泉厦半壁之安危，即余一身所关系；自宜通筹缓急，以定去留。不容稍存成见其间，致有偏倚，貽误事机。当函覆星使并上书制军，请暂缓渡台，以便驾轻就熟，通筹全局，极力布置。苏澳之防，并请先行择人往守，俾专心壹志为固本之图，而后可为外侮之御；非有所趋避也。

十六日，发书后，据谍探：日本兵与生番战，互有杀伤。日兵已进踞番境四社之地

，筑室其中，蒙以铁版；并受降十一社之众，授其旗帜。闻其国火轮战船约二十六、七号，名目綦伙。其一名「龙骧」，购自花旗，糜费二百万金；未卜确否。火轮商船六十有九，其中铁铸者二十有二、布帆夹板者十有八。外此，或尚有侦探所未及欤？未可知也。又称：其国王命水野遵者到台分兵两路，中秀孤鸾——即泗波瀾，一由琅■〈王乔〉，为首尾夹击之势；胜败以六年为期。中将都督为西乡从道，彭城中平副之；小将赤松，先锋佐久间。官文武大小约十余人云云。徐仲眉书来，殷殷劝驾。就事论事，所以为余公私计者，未始不善。顾余负国深恩，事当图其大者远者；非惜此陆篆，亦非恋彼厦门，并非畏避苏澳。实闻南路番社为日本踞者十余，其势已将反客为主。今日之事，通筹全局，要在沿海诸省；其次闽中，又其次乃台湾也。苏澳之防，诚不可少。但闽省如苏澳者不知凡几，而陆路止一提督，其不能分身明。诚获置身内地通盘规画，固内地，尚可以兼顾苏澳；一至苏澳，则株守海角一隅，浑如井底之蛙，无能为矣。因星夜以「日本狂悖渐形，通盘审己量敌，亟应厚集兵力，藉以消弭衅端」缘由具疏，由驿六百里密陈。其略曰：『本年三月间，日本藉称旧怨，加兵台湾生番。其陆军中将西乡从道兵抵番境后，具文照会闽浙总督李鹤年，以到彼开导酋长，恐其抗抵，是以带兵前往等语。随经李鹤年援据同治十年所换和约，明白理论，谕使退兵，照复该中将；并分咨到臣。嗣连准福州将军臣文煜、闽浙总督臣李鹤年、前江西巡抚臣沈葆楨先后恭录三月二十九日、四月初六日谕旨两道，咨会前来。伏读之下，仰见我皇上轸念海疆、兢兢防范之至意。乃本日迭据探报：始则日本筑营台南琅■〈王乔〉山等处，围以木城。继则盘踞生番四社之地，多造屋宇，上盖铁版；胁降十一社之众，授以旗帜等情。臣一介武夫，知识浅鲜；自顾渥负天恩，涓埃未报。当此事情重大，不能不日夜探听消息，窥测机宜。窃有见于今日之事，兵威早振一日，则敌踪庶几早戢一日；敬为我皇上陈之。日本虺蜴为心，豺狼成性。自元至元间范文虎、阿塔海十万之兵歼于平壺岛下，于是有轻中国之心。明之永乐、嘉靖，得刘江、俞大猷、戚继光等先后统兵力剿，寇掠始息。我朝二百余年，三岛蛰伏，未尝蠕动；非真能安分守己，殆震誓于征服准部、回疆、西藏、缅甸、金川诸处历历武功照人耳目，揣羽毛未满，遽不能高飞耳。然此二百余年中俯首帖耳之日，亦即养精蓄锐之日。洎乎道光年间，西洋各国既有南洋诸埔通市于我海滨，日本遂急急与交好、与婚姻，渐且从其衣冠、学其战具，一切皆效西人所为。现探闻该国火轮战船二十六、七号，其一名「龙骧」，购自花旗，费银二百万两；又火轮商船六十有九，内铁铸者二十有二，又布帆夹板船十有八。以彼区区数千里之岛，且夕焉能办此！由是以思，亦可知其数百年来静而未动之蕴蓄矣。夫彼蓄数百年之心，即蓄数百年之力；一旦蠢动，其心詎可问、其力岂易穷耶！心不可问，则未逞其心，不肯休也；力不易穷，则自恃其力，不知止也。如徒以口舌谕之，恐今日唯唯于先，明日否否于后；虽至舌敝唇焦，于事无裨。不然，同治十年之约，曾几何时？照会李鹤年之文，曾有几日？非即反复无信之明证确验欤！苟非真有以折服其心，未必有所忌惮、翻然悔悟：此敌情之灼然可料者也。昔人云：知己知彼，百战百胜；又云：有备无患。应恳恩飭沿海诸省于各海口仿造洋式炮台，一律完固。或购、或制，筹备洋炮以实之；或兵、或勇，简练行伍以充之。并即购备水雷及诸御敌之具。臣非不知经费浩繁，无如熟察时事

，虽曰一台湾，实有关于沿海全局；虽曰一日本，实有虑乎外洋诸邦。自来大事，不能惜费。惟有恳我皇上撙节他处可用、可不用之款，以济此万不得不用之款而已。就中闽海一带，尤为倭船出没往来之所。外、内口岸，均宜设立台寨，兵勇、炮械，棋布星罗；尤应倍加严密。除应备铁甲兵船、水雷、电线等件经沈葆楨会筹奏请外，窃计分布大小轮船，福州、厦门两海口每口应驻四号，澎湖二、台湾六，共需船十有六；无事派定屯扎，有事相机调遣。至全闽经制之兵，其数仅敷防守，然亦罕经大敌；似应就北五省、两湖等处招致能死之士六十营——计三万人，恩派威望素着、外国敬惮大员二人，一统领三十营于内、一统领三十营于台；仍命洞达时势、熟谙韬略之大臣居中节制调度，将使帷幄运筹，随机应变。似宜专一事权，勿待此商彼酌，或以意见歧异，贻误事机。而彼统领在台者，居嘉义、彰化，为南北适中之地；统领在内（者），居泉之厦门，为海口最要处所。惟厦门四面隔水，必须候风潮，不能径渡；即以驻厦之兵勇、长夫，合力于高崎地方筑一巨坝，直接对岸。是处港面狭浅，相去不过五、六里；得以数千人行事，不半载可成，亦于海道无碍。坝成，斯兵能神速；兵神速，斯厦门可保无虞矣。各营长夫所以肩运子药、军装，仓卒殊难觅雇；应请照直隶淮军章程，由营官豫养：亦行军神速一道也。似此台、内两地紧相犄角，沿海各省遥为声援，四面兵威连为一气；彼时遣一才辩之员向彼按据条约侃侃而谈，宜必有敛兵悔祸之一日。万一不然，则请我皇上敕下总理各国事务衙门约会驻京公使并饬南北洋诸大臣约会各处领事，语以日本不即撤兵，我国沿海各口大者须安置水雷、小者须沙石填塞，以与日本决一雌雄；而各国俱宜暂缓通商，一俟日本事定，然后如常贸易各等意。彼各国类皆孳孳为利，必不肯以一国之故，废诸国之图。诚目睹我之海口无一不整、器械无一不备、兵勇无一不足，并非托诸空言；必向日本同声交谪，勒令退兵。而日本亦惟恃与各国交通，故能如此妄动；果而彼族尽为我用，区区日本因人为热，即欲不退，焉得而不退乎！大抵兵以备而不用，为上策。要不能不及此豫备，以为或用、或不用两得之谋。如果衅端再自彼开，我已有以御之，亦可无临事仓黄之虑矣。况日本一国密迩海东，迥非西洋各国远隔数万里外之比。其意，将以生番为外库、外厩；情形显露，本不可不立折其心。又况各国麇聚中土，难保不阳奉阴违，树之党而赍之粮；非若有明之世，他国未集，可以仅禁沿海居民毋与交接已也。振兵威以寝狂谋、遏贪志，实为目前切要良图。微臣为此，终日不食、终夜不寝；辗转以思，舍此别无下手之着。日前沈葆楨奏调臣渡台驻守苏澳，该处为台北要地，诚不可不防。惟先准文煜、李鹤年咨会，创设练营、添募壮勇，以为通省内地根本之图；事方经营伊始，未便分身。而台湾现经武而未用武；权衡事势缓急与臣责任轻重，刻下似宜先在内地帮同文煜、李鹤年将全局布置完固，为内地树藩篱，即为台湾壮声援。其苏澳一隅，应别调镇将以资扼扎；经分别咨复去后。臣愚昧之见，通盘筹划，耿结杞私；是否有当？出自圣裁云云。

是年六月十三日，奉上谕：『罗大春奏「日本渐肆狂悖，密陈筹备事宜」一折，所奏闽省海防及各省海口应行筹办各节，不为无见。所有台湾暨福州、厦门等处，前经谕令沈葆楨、文煜、李鹤年妥筹办理，并谕沿海各督、抚、将军豫为布置矣。该

提督前经沈葆楨奏调赴台，并据文煜等奏已催令该提〔督〕东渡；其厦门一带防务，改派孙开华接办。着罗大春刻即驰赴台湾，会同沈葆楨、潘蔚督率淡水等处防兵妥筹布置，以资得力。钦此』。至是，余乃获决计作东瀛行也。

嗣得沈星使咨抄五月初七日疏草，知于五月初一日由马尾乘「安澜」轮船，潘帮办乘「伏波」轮船，洋将日意格、斯恭塞格乘「飞云」轮船行。星使于初三日抵澎湖，勘炮台、水口形势；初四日，乃抵安平。据镇、道称：四月二十日，倭船一只装生番首级及伤亡倭兵回国。二十二日，开两只赴厦门。二十七日，开一只赴后山；琅■〈王乔〉遂无倭船。二十九日，又有轮船运军装、粮食而来：此水路情形也。岸上倭兵约二千余人，一扎大埔角、一扎琅■〈王乔〉、一扎龟山；时以甘言财利说降各社。在下者已为攻破；余数百人逃在山巅，倭人未能仰攻。龟仔角生番亦不肯降；其降者网索等十一社，倭营给一旗为凭。有加锥来社生番头人引倭人往拔礮社驻扎，则已转过琅■〈王乔〉山嘴，属后山界址矣。二十八日，倭兵添二百余人从石门入、八十余名从风港入，杀生番三名，擒五名：此陆路情形也。探员晤倭先锋福岛，据称败生番三社，取首级十二颗；伊兵伤者五十余人，死者二十余人。二十六日之夜，又被其杀伤五人，死者二人。官兵所报，生番死者多于倭〔兵；倭〕将所称，则倭兵死者多于生番，或者留为索偿地步，未可知也。又据淡水厅报：日本兵船名「牧源源吾」者载兵百余，由台南绕后山一带过噶玛兰，入鸡笼口买煤百五十吨而去。疏中大意，以辰下所宜行者三：一曰理谕、一曰设防、一曰开禁。开禁，非旦夕所能猝办。理谕一节，潘帮办于过沪时，尝与其公使柳原前光辩论，商允退兵；兹拟于初八日同台湾夏道献纶及〔洋〕将日意格、斯恭塞格等携该公使手书亲赴琅，面诘其中将西乡从道。而设防之事，目前仍不容缓。台地设防之要，以郡城为根本。安平海口沙水交错，望之坦然；必仿西洋法，于是处筑三合〔土〕炮台，使不得停泊兵船而后守。台地精华，又在北路淡水、噶玛兰、鸡笼一带，物产殷阜。苏澳为民番关键，尤他族所垂涎；故日意格谓急须派兵驻扎也。现已商派「靖远」轮船迎罗提督于泉，并饬「长胜」轮船同通晓算学艺童转入后山，周回量水深浅，探其形势；暨由镇、道等添招劲勇，着力训练、多筹子药，以备不虞云云。接省信，以日本派大臣三员乘我「飞云」轮船入都，将与总理衙门理论云云；未悉确否。

十九日，「靖远」轮船至，余以署中寻常公事属委中军参将周德富代行，具疏驿递；定期东渡。

二十日，由秀涂登舟。是晚，泊厦门；候黎召民观察偕行。

二十一日，扬帆。是晚，驻澎湖。有法国领事德兰颀来见，言各国和好有年，今日本无端违约称兵，于理不顺，我国亦抱不平；当极力于中国调停等语。

二十二日，次安平。午后，舍舟入郡；谒沈星使、潘副帅毕，归宿于行馆。

次日，星使来过，与论南北路情形；既与镇、道及同城文武一一晤谈。寻洋将斯恭塞格来，议论御敌之策，颇中窾要；且以日本恃其兵精，妄图非分为词。余曰：『不然。日人虽熟于火器、精于水战，我中国以陆军困之，胜负之势，亦止于得半之机。即如中国长发之变乱者十年，当凶焰鸱张，非不以为难于戡定；卒之一败涂地，以次灭亡。日本之于发逆，不知自视何若！而我则以逸待劳，尚不肯以发逆相视。不然，试于平原旷野，各提千人一角其技、一试其能，中国恐亦未必多让。未卜足下以为何如』？斯恭曰：『壮哉言乎！倭人何能哉！倭人何能哉』！一笑而罢。斯恭者，英国人；星使奏邀渡台，月与千二百金，用以赞画沿海防务者也。

七月朔，自郡城启行。是晚，宿下加冬老店庄。职员叶阳春求见；余在郡闻其熟悉中路番情，随给以谕帖，嘱其留意招抚。

次日，宿嘉义县城。

初三日，宿彰化县城。

初五日，宿大甲。

初六日，宿后垄。

初七日，宿竹塹。

初八日，宿艋舺。

初九日，小住；出沪尾，勘海口炮台。

初十日，发自艋舺。是晚，驻鸡笼。

十一日，至双溪。

十二日，宿头围。

十三日，抵苏澳。晤夏筱涛观察（献纶），询以台北防务及开抚情形。十四日，同往相视新辟山路；盖渠将南旋，俾余代其任也。

至十七日，夏筱涛以「开山抚番」事及所部土勇九百二十人、料匠百五十八人交余承受讫。次日，乘「福星」轮船行。

十九日，遍历苏澳海口山路，募足土勇、料匠。札委噶玛兰都司带练勇前营进驻东

澳。

二十日，生番距苏澳三、五里，盗杀樵民三命；立遣营勇救之。

二十一日，檄头围县丞邹祖寿，畀数百金，令采采食米。

是日，陈光华报有答毕罕生番七十余人来归化；次日，遣周都司士得赍归化旗二并犒劳等物收抚之。

二十三日，陈光华荐拟充哨长陈辉者来谒。余思开路工程，杂用客兵，不如专用土著；计日给费，不如按丈定值：为价廉而收功易。乃决计陈辉司其役，山路每丈予洋镗一圆，平地别议。陈辉者，故积案如鳞，有司捕之不获；用人之际，量从末减，亦古人「使诈、使贪」意也。

二十四日，檄陈光华相视沿途可以建碉设堡者以闻。

二十七日，陈光华报：二十五日兴工，已开路二百丈有奇；唯闻前途斗史社番凶悍殊甚，巡兵力单，不足于用。因商诸星使，请添募精勇三营、兴泉壮丁千人，专为开山计。

二十八日，亲赴南风澳相视海口；拟派福锐左营后哨驻东澳，为开山者护卫。

二十九日，视南澳山脊宜筑台安炮，即于是日始工。度支垂罄，拟咨星使：凡噶玛兰应解郡之款，许截留济用；并告以计丈开山给价大略。遣人往南风澳监督开山及建造炮台事宜。

八月朔，承委官告开路已达大南澳岭下，计程二里有奇；踰岭四、五里为小南澳。

初二日，开至遍仁岭。立望台以视岭下诸番社，瞭如也。谍闻大南澳番将阻我前军，因令停进开之工，回修后路加广；仍以营勇卫之。闻潘炜如方伯于五月初八日偕夏观察及随员张斯桂、洋将日意格、斯恭塞格抵琅■〈王乔〉，次日诣倭营晤其中将西乡从道，持沈星使照会及过沪时携彼公使柳原前光一函，与之反复辩论；理屈词穷，托病不见。传生番头目至百五、六十人，大意谓受日本欺凌，恳求保护。嗣潘方伯诸人以倭将既托病不出，即与告辞；西乡转又挽留。晤次，仍以生番非中国版图为辞，示以「台湾府志」所载岁输番饷之数与十五社生番切结；断断然以所用经费无着为言，请致书柳原、一面由电报回国暂勿添兵，因中国便轮船分往厦、沪而去。方伯以原船避风澎湖，乃取陆路达凤山回郡。星使意，非益严戒备，断难望事有转圜。因疏请敕下南洋大臣借拨久练洋枪队二千人，航海来台；南路以张奎垣镇军（其光）增募五营合原部一营遏其冲，北路则以夏观察专其任一——盖以余先为

李制军留办内地之防巡，不能渡台也。又以张镇军、夏观察之荐，请调前南澳镇吴霁轩（光亮）、浙江候补道刘兰洲（璈），俾资臂助；并以前署台湾镇曾辑五（元福）提倡南北路乡团暨分招后山向导，谕致屯番、生番各头人，与之要约：此布置陆路大略也。闽厂轮船除传递信件外，不敷调遣；拟于沪局添调数号，由吴桐云观察（大廷）统领来台。前奏定闽厂轮船二百五十匹马力者设炮勇十名，百五十匹者八名，八十匹者六名；今拟二百五十匹马力〔者〕增五十名，百五十匹马力者增四十名，八十匹马力者增三十名。又以现议购外洋里明东枪六千杆——每〔杆〕配药子四百，值洋镗三十一圆；铁甲船啮水丈八尺者——亦与中国港道相宜，今索价百二十五万圆：缘枪值尚须议减，而船之新旧坚脆又未明言，尚当斟酌云云入告。倭营自潘、夏二君归后，五月十九日将前扎番社各营先后撤归龟山；而二十一日复到一轮船泊龟山之下射寮港，计载兵二百余、倭妇十余，并酒、米、铁链、农器〔以及〕松、桐、杉、栽草种、花种各数百，分植后湾、龟潭湾等处。复购土人，约牡丹社生番于保力庄议和。又有倭人成富清风者从北路航海来，言「王」字生番不肯从和，请兵往攻等语。二十三日，又到轮船一只，驶往后山而去。睹此情状，则筹防益难稍懈。五月二十七日，夏观察挈参将李学祥部勇航海直抵苏澳，以王游击开俊驻台南东港、戴总镇德祥镇扎凤山；张镇军以廖有富尚未成擒，部勇未便遽撤，以前哨于初四日赴凤山。潘方伯以兵力太单，由曾辑五镇军募土勇五百人，交烟台调来之税务司博郎练成洋枪队。牡丹社之北可通卑南觅，其番社七十有二——约丁壮万人，闻倭将暗遣人勾卑南番目陈安生；因立派袁同知闻柝招之，立〔即〕薙发来郡，赉以银牌、衣物，以原船遣归。其地正对凤山，膏腴远过琅■〈王乔〉，正倭奴所垂涎。由海道绕山南而东，轮船日半始至；陆由下淡水穿山百七十余里可通，惟锤幽凿险为难耳。星使前请就南北两洋大臣借洋枪队五千人，比得李节相书，以屯扎徐州之洋枪队十三营应，令唐提督定奎带至瓜州航海而来。兵力既厚，彼族诡谋有所慑而中阻矣。又澎湖一岛为台、厦命脉，守备亦不宜空虚；飭副将吴奇勋募新勇一营，并于上海购大铁炮十尊与之。洋式炮台一时未易集事，今以巨筐实沙土、小石，以固藩篱。日意格所招电线洋匠到台，拟从台郡北至沪尾转白沙渡海，过福清县属之万安寨登陆，至福州马尾办起。此事虽经入告，卒之议而未行。自后洋人遂有不费中国帑金，由省门分水陆造至厦门之请。当事者先许而后悔之，致俛制俛废，中外几酿成巨狱。后乃归咎陆存斋观察（心源）与丁韞石太守（嘉炜）两人，事始中止；而所费帑金为不少矣。潘炜如方伯自琅■〈王乔〉归后，即函致倭使柳原前光，申明前约；以未得联衔印文为词，如所请与之，闻柳原已由沪入都矣。倭营之麇聚龟山、风港者，仍不时游奕各庄，并有调戏柴城民妇、伤其族人之事。其乡声众围捕，亦创一倭兵颇；归乃率其属数十人往寻衅，其魁遏之始息。又胁山后大鸟万、干仔帛二社与说和，并增百余兵于相距风港二十许里之茄鹿洞哨探。我军移东港王开俊一营进驻枋寮，以戴德祥一营由凤山镇扎之。六月初七日，潘方伯于凤山旧城招募土人并激励乡团，暨于海口打鼓山、大科围、五块厝等处踩勘营地，催建兵棚，备淮军到时屯扎。张奎垣镇军自凤山周巡至下淡水之麟乐、上元等庄；同知袁闻柝驻卑南，声言彼处番目与西路各社素不相能，将为开路之举，必自下淡水入手，商诸张镇军；又以为由潮州庄开通，路直而坦。当镇军到凤山时，千

总郭占鳌、都司丁汝霖等先后率昆仑饶、望祖力、扶圳、鹿坡角、山猪毛等社番目遮谒求抚，均慰受而遣之：此五、六月间南路所办大概也。

初三日，接星使书，如所议增募精勇三营、壮丁千人。既而复思所辟地面既大且远，随改三营为四旗，以「绥远」名其军；令李东来、李得升赴嘉义、彰化各募其一，余二旗及壮丁千人拟于内地募足之。是日，官军正开路下岭，突有凶番数十出扰；后见工匠人众，抛枪而遁。寻复纠党数百人设伏深林密箐间，乘我营勇伐木、聚石以结垒也，仓卒出扑；各营齐力击之，毙番人一、伤者数人，我军亦受创五人。

初五日，赴五里亭、东岭脚回，拟沿途建筑碉楼，俾相联属。既而各军进驻大南澳之北岸，彼处番社惩于前日之创，无能出扰。惟悬军深入，米粮转运为艰；因以其事属之围头县丞。沪尾拟造洋式炮台，有林绅维让者愿以万金助兴，作正函商星使。适星使书至，以福靖前营北来；盖徇余前请也。

十三日，得大南澳报：以彼处西河大水冲为四，官军阻莫能济。余亟命以木柜实沙石为趾，联巨木柜上以通行人。于是各哨兵弁如法成造，道乃不梗。是日，遣都司周士得自沪海关领经费内渡，募丁勇。余乘天晴，催米济军食。连日得南来谍报：倭人伏而未动；惟疾疫盛行，死亡相继。

十六日，大南澳木桥成。工匠襁属而进，生番匿不能出。径辟草莱十余里，遣冯安国督造前途碉堡。前委在中路抚番各员料量粗有成效，余以声势隔绝，力难兼顾，飭原委员此后凡番人归化，可就便诣黎召民观察（兆棠）营取进止。盖中路之事，奏明属其督办；清界限，亦以杜诿卸也。

十七日，致星使书，略道近日开、抚情形；并以雇民船运粮米不便，拟自制哨船备转输，且以供巡缉。

十八日，承得报：承募绥远右旗李将东来病歿艤舫；当委李英代之。

十九日，噶玛兰营简守五里亭碉堡兵十余人为生番要刺其一于途；余亲诣视，知其行不结队、枪不燃火，懈弛无备，致为所乘。因重责生者而恤其死者。

二十一日，委弁赍契箭催南风澳米，并开令黄土才募精勇守碉。

二十二日，为文致祭苏澳海神。自开山至大南澳，余皆未亲历；至是，乃莅其处。祭其山川、原隰，遍览形势而还。

二十九日，陈光华来，当飭布置沿途修路建碉事。以士伍不敷，开路工程尚未能迺前进。盖自夏筱涛小住苏澳月余，率所部镇海一营并募土勇千三百人、料匠二百

；及移交于余，只九百二十勇、百五十八匠并银万两。先渠南旋，计开东澳路二十余里、筑碉楼一所，抚新城及附近东澳番数处，要皆草创之举。盖山路俱垦泥为级，阑以横木，左右各钉木桩；非如石磴坚固。且须盘旋曲折，否则人马既难陡上；而沙土性松，一遇大雨，山溜直下，泥级即有坍塌之虞。又番性反复，与民皆有深仇。虽经劝谕释忿，严禁互杀，并取番目归顺摹结；若辈冥顽不灵，究皆未足深恃。余考苏澳至奇莱水程百余里，陆路二百余里。其水则悬流恶湍，险仄异常；自宜取径于陆，以利师行。而陆之迭嶂丛林，素皆人迹不到；登高以眺东澳之南，阴翳蒙密，极目无际。兼之四时草木皆青，燃之不爇。额刺「王」字之番，更以杀人为豪。其俗得一头颅，方能得妇；处事不论情理，以得级之多寡为曲直。故时挟标枪，伏莽狙击；中则割其首，吮血刮肉而去。兵勇、樵夫被其刺杀者，不时而有。若不节节疏通直至奇莱，既恐他族兵力稍集，占据新城；而欲渐迫渐进，又虑凶番随在梗阻：实有戛戛其难之势。大抵淡水一带幅员辽阔，几六百里；其间大甲、后垄、竹塹、艋舺、沪尾、鸡笼均居水陆之冲，而沪尾为全台精华所萃。鸡笼广产煤斤，尤为外人覬觐。沪有南北两岸，鸡笼则有内外两口；其北岸、外口旧有炮台各一，缘口敞水深，必于南岸增筑洋式炮台一座、内口倍之，方足稍资战守：此以御外侮也。至噶玛兰西、南、北三面皆迫生番，或数十人、数百人为一社，多或一、二千人；种类非一，嗜杀则同。较之南路，招抚为难。何也？南路皆有通事、土目，亦有汉人错处其间；此间则扞格不通，散漫无纪。所与往来者，番割耳。而番割又纯用术欺，以牟其利；卒之番无如何，报以一杀。故十充番割，九为番歼：土人言之历历。论抚番，不能不用番割；究之，绝不足用。至于民、番互杀，历有年所，已成不解之仇。兰民岁遭番害，不下千余；番之死者，亦十之一。目前所禁民之不杀番，不能禁番之不杀民；番割又私以火药、铅弹易其熊胆、鹿茸，番得之如虎傅翼；而民益困矣。故通筹全局，非有六营之众，不足以资分布；非于沪尾、鸡笼口增筑炮台三座，修其北岸、内口二座而配足炮台药铅，不足以资捍御。此余所以迭次寄书星使，因枋桥林绅维让、维源兄弟许捐万金，思借是以开其先而为台北树不拔之基也。

南路自王开俊兵驻枋寮之后，倭人戒备益严。六月十三日，倭兵由龟山分扎一棚于三家厝，别有十余人乘船自风港沿岸至枋寮测水浅深。十五日，复有轮船一只载衣、粮接济。十六日，倭人水野遵入猪塹索、高士佛诸社，声言索取前年琉球被戕首级；实躬带远镜，周览各山。十九日，倭兵自后湾开道，上达龟山之顶；风港之营，又欲分出平埔住扎。二十一日，倭通事彭城中平谒琅■〈王乔〉委员周有基，反叩以前日中国所议，柳原前光何以尚无回信？中国四处布兵何意？托为查示。星使乘其心动，具文劝令回兵；未知有所照覆否？十五日，委员袁闻柝带番目买远等五十六人至，星使抚谕而慰遣之。其目苦求兵驻其社，星使怜其恳切，拟檄袁丞募土人之勇者五百——名其军曰绥靖，无事以之开路，有事以之护番。南路民团，经张奎垣、曾辑五两镇军亲行激励，渐有规模。当张君之径下淡水也，扶里烟六社番目率百余人迎谒，谕以薙发、开山；各番目亦俱点首遵依。目前番众输诚，若此开禁之事，可望日起有功。黎召民观察（兆棠）至自粤东，星使以专司营务，襄赞戎机

。潘方伯则往凤山督练新军，催集民团，绥抚番社；并饬地方官豫筹客兵薪米，以免临时周章。大抵台地凡六、七月间台飓时作，琅■〈王乔〉浪涌如山，轮船难以舣泊。龟山倭营，又当风冲；倘我陆师厚集，乘烈风暴雨一鼓作气，彼虽有铁甲船不能近岸，孤军援绝，不难尽歼之海隅。此等情形，亦倭所深悉；故日来情状，倍见张皇。迨八、九月风浪渐平，彼之轮船麇集海岸，互为攻援；我之防水较防陆更急，此时非多备战舰不为功。而倭营之在风港者，日来益以盖兵房、掘濠沟、竖竹围为事；其士卒，则令之练习洋枪、洋炮。又设席招邀近营村民，好言抚慰，俱分给绫、布、毡、扇等物。连日又以三船载倭兵六百余及米粮、枪炮、洋毡、杉板等物，另琉球国人百余则皆工役——非兵也。其死〔者〕剖腹，实以盐与樟脑，殓以木桶；并病兵百余上船，陆续驶归。并据游击王开俊稟：六月初三之夜，有倭兵到茄鹿塘，向竹围遥开排枪数迭，且有小船载兵近岸；哨弁李长兴令兵勇伏围以俟，近乃施火器应之。未几寂然，敛队而去。倭之初举事也，有美国人曾充厦门领事曰李让礼者阴为谋主，当事言之总理衙门照会彼驻我北京公使；至是始为厦领事擒送于沪，又为沪领事所释。澎湖守备素虚，近乃假海关「凌风」船驻彼教习，分闽厂六船随之。六月已后，台郡风雨兼旬，陷城垣千有余丈，坼裂者又三、四百丈。海外常苦地震，土弱沙松，砖石又不易致，故尔致此。所议购铁甲船，经船政总监工叶文澜同日意格赴沪商榷。英船，非威使妥玛周旋，既难成讲。日耳曼一船，有船无炮，且制逾十稔，水缸只许用两年；费百余万帑金，易一朽烂之船，将益为外人所侮，转不如鸠工自造之为愈也。以营务处黎君驻师中路。盖水沙连、秀姑峦一带为全台适中、腹背膏腴之壤，外人之在台者往往利啖奸民，于中潜煽；左近社寮所设教堂多至数处，又深林迭嶂久为罪人积匪逋逃之藪，难保他族之不勾结串诱，断我南北之路。分全台为三段，节节布置；更得淮军铁甲船以为之备，使彼无隙可乘，自必帖耳而去：此「不战屈人」，策之上者也。倘其妄肆要求，朝廷更持定见以却之。彼暴师于外，怨讟繁兴；不待挥我天戈而内变作矣。闽厂所造轮船满十有五号，曰「镇海」、曰「湄云」、曰「扬武」、曰「飞云」、曰「安澜」、曰「靖远」、曰「振威」、曰「伏波」、曰「福星」、曰「万年清」、曰「济安」，皆兵船也；曰「永保」、曰「琛航」、曰「大雅」、曰「海镜」，皆商船也。近以海防吃紧，需船颇亟；而厂中并有二百五十匹马力轮机水缸两副，当事乃议接续兴造。多造一船，即多精一船之功；多得一船，即多收一船之效：理固然也。七月十二日，七轮船载提督唐定奎淮军自旗后口登岸。有旨：『柳原前光在都，经总理各国事务衙门王大臣与之剴切辩论；该使臣语意支吾，尚未就绪。务宜乘此兵衅未开，速为布置』——而庙谟宏远矣。日意格雇来炮台洋匠头二人，曰帛尔陀、曰鲁富；枪炮洋教习四人，曰都布阿、曰拉保德、曰哈利孟、曰贝鲁爱。由此度地绘图，安平炮台即可以就次兴工。通商税则：外国煤进口，吨征五分；土煤出口，每百斤征银四分，计一吨应征银六钱七分六厘。近台湾产煤甚富，当事乃议请出口土煤如入口洋煤征税，则开采之利不致尽归洋人矣。八月初四日，倭将遣其酋吉利用通等六人自琅■〈王乔〉递公文于我钦差大臣，一则照会「兵伤乡民、阻我驿夫」一案倭诸言语不通，请以后遇有公差，给予执照；一则覆我劝令退兵，谓柳原及大久保必能商定彼兵之进退，应须朝命云云。大抵借斯一行，以探我虚实。既以洋银七百圆谢我

奸民为其招番及取琉球人首级者；仍勾致近番，给以旗号、哔吱、白布等物。惟疾疫盛行，死日四、五，病者则难数计；其副都督川崎祐、通事宜彭城中平、管粮官富田等，俱相继病。美国人机慎者，月得其工钱千圆，为入牡丹社绘图；亦病笃，舆病归。我二起淮军，于十四、五、六等日以次由旗后抵扎凤山；张奎垣、吴霁轩两镇军所募粤勇三千余亦到，拟驻郡城。同知袁闻柝亲督卒徒自赤山步步为营，跨狮头山，入鸡笼坑，距昆仑坳——盖诸山之脊也。卑南番目牙等、陈安生等已自率番众由本社循山辟路，出至昆仑坳相迎；其附近番社各缴倭旗多面，以示输诚。八月初八日，复有昆仑坳及内社番目率二百许人来袁营，请领开路器具，愿为前驱；分别赏赉。诂其旁有望祖力社凶番——其目名武甲，及卑南社素仇，率众伏杀之；番与抵御，杀武甲等三人。袁闻柝急驰至，排解之。星使虑袁军之深入无助也，以副将李光率勇三哨扎双溪口、游击郑荣率一营驻内埔庄应之。十一日以后，内山风雨暴作，棚帐皆飞；为之停工者数日。然一过昆仑坳，则近卑南地界；经诸番垦荒辟秽，虽未必合法，然从扩而充之，沿途尚易施工也。安平洋式炮台，以候补知府凌定国会洋将督造。八月十九日，大雨以风，「大雅」轮船沈于安平口，死者十人、受伤者十有九人；「安澜」船亦以避风不及，飘至凤山县二十余里之凤头鼻破焉，死者一人：此八月以前南路大概也。

九月朔，沪尾、艋舺取陆路解饷银至，慰甚。巡捕何树春自泉州赍到铁器及余家书，喜高堂强健。黄土才应募碉勇八十人，录而用之。

次日，沈星使书来，以余有招致居民之议，恐穷民力薄拮据旷时，拟就近劝富绅林维让于已开路处分段屯垦，则彼之获利长而我之成功速；并以守备黄朋厚受番标伤，谓必急行垦荒，则凶番无由伏莽，开路方有实际也。

初三日，率小队哨至五里亭巡视而返。加礼宛番目番陈八宝携其同社四人，请以已垦田园给照；余姑许，仍犒而遣之。南势社通事林乞食等，亦以招抚为请。前军之开山者以渐至大浊水苦兵力不足也，于用驰书星使简轮船载都司周士得内地所募勇，兼及此间雇船转米之难。王玉山游戎以田大兴来贻我食物，聆南路军事綦详。

初七日，戴芝亭所部福靖前营由鸡笼登陆，抵苏澳；绥远右旗亦在淡水齐至。

初九日，得星使书，以余所论招富民招垦事不谋而合，嘱即出示广招徕，营哨官有愿自任者听。惟领垦必有限期，不即易之他；所在荷锄云兴，则鬼蜮无托足所。其并许土勇，一例给以夫价。其意实望余能进奇策扼吭拊背，则与中路声气通矣。

初十日，令福靖前营以三哨驻大南澳，分两哨驻大浊水。前路既通，拟以王得凯一营、李英一旗驻新城；候李得升继进，则以陈光华、陈辉煌扎大浊水。部署已定，虽目前兵力不厚，然自是便略有措手处矣。鸡笼、沪尾炮台，委员林桂芬以图式来。数得南路谍报：日本狂悖日甚，似此举决不可缓：特星使颇不属意于此，亦独抱

杞忧而已。以副将周维先为营务处。邹县丞来，余重以办米事相属；以此间民食最为当务之急也。李得升募左旗勇丁到，如取上伍籍录之。林朝选亦募五十名至，令道海趋新城为前军向导，并葺治馆舍之役。

十三日，点右旗勇丁之应募入伍者。淡水绅士李清琳以桶后六社生番归化稟。

次日，曾捷春复以淡水西潭底、下楼等社男女番四百余人名籍来；余以鞭长莫及，饬归淡水厅受而遣之。

十七日，王得凯来；以前途人少、又阻雨，前进殊难。

次日，既点验右旗勇丁讫。星使书至，前请饷开垦及造船事，一如所议行；因即示告嘉、彰、兰、淡所在招徕。

十九日，戴芝亭所部及绥远左、右两旗以次拔队进。惟闻王玉山躬当南路前敌，抱疴綦剧；为怵怵耳。先是，遣人自东澳迄新城沿途诛茅结屋、储峙粮食，为大军进发计。至〔是〕，以陈光华一军为头队，王得凯一哨、李英一军为二队，李得升一军为三队，航海营新城、得其黎一带；陈辉煌一军分两哨，营大清水溪；戴芝亭一军，以两哨营大浊水溪、三哨驻大南澳，以朱荣彪两哨隔河而营。各激励士伍，首尾联络，以护卫开路：卒徒直达新城。特自初九日以后，风雨兼旬，山溪骤涨；大南澳桥工未竣，依然跬步维艰耳。至前途，所以开辟者具报以抵石屋——石屋者，以石崖如屋而名也。自大南澳至石屋，中皆平坡，纵横数十里；虽管茅荒秽高至丈余，而山水清腴，勃勃有生气。溪溜成坳，可备旱涝；后日耕种，悉属膏腴。过石屋十余里，即浊水溪也。现时新军渐集，然必碉堡足恃，凶番乃无可逞其锋；居民渐多，割番乃无所施其技：此余与星使所以亟亟于招垦一事也。南路自八月二十七日倭营先后到轮船者二，来兵七百余人、工徒二百余，药铅、毡毯、锹锄等物称是。其归也，载抱病军役，殆如所来之数，且多加焉——盖因病而番替者。九月初，忽移一营于新街渡头；庄民汹汹，倭遂撤之而归。既乃列大铜炮之属数十营门自卫；又四张文告，白其番戍之由，众乃安堵如故。然疾疫盛行，死无虚日；士皆泣涕思归：倭情自此馁矣。琅■〈王乔〉诸社，经潘方伯遣人入山，咸受约束；既又并海绕至卑南，清稽户口而返。袁丞闻柝开山已越昆仑坳，更八十余里即卑南界；凭高俯瞰台东海色，如在几前。惟山径愈深，番社愈杂，沿途留队扼险，兵力渐单；星使檄张奎垣以新到粤勇两营济之。安平炮台，由洋匠踩趾绘图，拟设于三鯤身。彼处下临大海，计去安平千三百余丈、去郡城七里有奇，为滨海离城最近之所；外可遥击敌船，内可近卫郡治。台方式，其制四面，仅宽八十丈。四角为凸形，中为凹形；凸者列大炮以利远攻，凹者列洋枪以防近扑。台顶至地，高丈六尺、厚丈八尺各有奇。外为濠，濠岸以一丈为率，注水以七尺为常。台容千五〔百〕人，置大炮五、小炮六、炮兵二百七十二人外，余皆洋枪〔队〕也。下为避炮之室，以备憩息。后为仓库，以储粮米、药铅。墙皆极厚，撑以竹木。洋法皆垒土为之，今外

砖而内实以三夹之土，为益固矣。董其事者，候补府凌守定国也。中路经黎召民观察募勇开辟，其间径途百出，岩壑阻深。水沙连一路，尤为逋逃之藪；积匪既尽，生番乃可绥之使来。其吴霁轩镇军新率粤勇两营自郡城至，开抚之事办矣。

十月初九日，郡中得总理各国事务衙门来书，称倭事已定；立约之事，彼此画押互易。其使大久保，旦日赴台湾会其中将西乡从道撤兵还；其所建修道路、房舍，均归于我云云。次日，倭领事福岛九成谒我星使，称大久保已至琅■〈王乔〉，并呈现行事宜五：一则约星使面交割；一则请注销前此文移为罢论；一则请彼国人民死葬于番者，以后许其祭扫；一则于交代讫，速以其情上总理衙门；一则请以后中外交涉之事，以时照会于彼驻厦新设领事。星使一如所请，以台湾府周子玉大守（懋琦）往。以游击郑荣安抚军自赤山拔队会之；事竣，即以镇守琅■〈王乔〉。而倭兵自初九以后，即载其輜重及诸用兵之具，陆续登舟。唐军所部三起淮军，亦自初四日以后尽去舟登岸。潘炜如方伯以倭事既定，请告就医旋吴。周子玉之到琅■〈王乔〉也，倭将既还我前发照会五，我亦以其二还之；并与索前与居民交涉字据，随出其租地合同七纸、风港租约呈词十一纸；余以彼将中有物故者，约以后均为废纸。出其风港营房三十七间、龟山老营草房百有二、板壁之为片者千二百有奇，当以安抚军四哨填扎之。其舟师放洋，则至二十五日始尽。黎召民观察亦以疾请告，于二十二日航海归粤；替其营务处者，刘兰洲观察（璈）也。此次倭事之发，上海道沈仲复（秉成）首将彼族情伪，颇于大局有裨；至是，星使首以「堪胜藩臬之任」荐。劝谕生番，招徕归化。总署书来，极以此事留意；大抵使已经归化之番谕未经归化之番，言语可通、譬晓易喻。又虑相近者挟其夙仇以相欺凌，则愈近又愈难相入；既须耐烦、又须持久，乘机以导，开诚相告：此总署意也。陈辉〔煌〕一旅自九月底进扎大浊水，夜间即有生番埋伏左近伺杀，昼则以数十人出没深林密菁中放鸟枪为狙击计；官军分路击，又鸟兽散去。大浊水，宽广约数十里；自大南澳至彼，约三十里有奇。其溪宽三十丈许，深六、七尺；我军之开路者，率曲踊而过。至跳踊地方，忽为石壁所阻；施工又靡易矣。内山人夫既众，终苦粮食为难。现示谕远近绅商：肯转米入新城糴军食，石百四十斤与饼银二圆又十之四；官以五千石为率，满则听自增减其值。周维先告大浊水桥成，前去十余里，傍海皆石壁巉岩；因谕陈辉煌循土山曲折而上。至山颠，更因势迤邐下三十余里，即大清水矣；然必穿番社而过。先至，见沿途布满竹签、地刺之属。彼社通事为新城李阿隆、李振发等，与陈辉煌素不相能。兰之绅士某，因以书给李阿隆等；谓陈辉煌一至新城，则新城田地尽为所有。李惑之，因嗾社番：如官军过境，即出与拒云云。虽道路谣传，不足深信；然亦不可不防。因谕前途：凡官军所届，俱设碉堡；令冯安国专董其事。陈辉煌之开路也，因阻于石壁，别无他径可缘；不得已，遣人至新城约李阿隆等招徕大鲁阁番社十余人，俾为向导，工程方有措手处。惟巉岬万丈，下临无际；开凿之功，终恐难施。余得信，檄噶玛兰厅多召石工，拟由大石公岭开达后山，仅三十余里。自此一往，一片平埔，易于为力；若晴多雨少，期月之功，计总可达奇莱。大抵大南澳、大浊水、大清水三处，必各驻一营，方足以资镇压。其间上下碉楼，以客勇，恐饷难为继；守以班兵，又屡易不宜。苏澳以下四碉，前此人仅给银

三两；既资其防守，又邮递公文，且责令按丈薙草伐木。伊等所以肯如此者，图将来开垦耕种耳。今拟更募兰、淡土豪百人，自第五座之枫树岭次跳踊、次石门岭、次遍仁岭、次九江坑，一如前法；糜费省，而得力为不少矣。

十二日，至五里亭。涂遇福靖中营逃勇二人，讯无护照，自承不讳；因置之于法。盖余先有示禁，亦以内山之苦非人所堪，思归者众；不从严治之，人皆效尤去矣。

次日，兰绅胡廷弼来，建开奇莱米仑港之议。港虽阔，久为沙壅；能治而成河，则数百之船可以舣泊。余以沙为动物，随潮进退；既开仍塞，奈何？胡曰：『不然！他处沙多，则随挖随淤；彼则泥多于沙，故易为力。行小船载挖泥机器，不费力也』。复论奇莱招垦事。余皆以异日许之。陈光华以石匠来，助陈辉煌开大石公岭路。

。

二十日（？），夏筱涛来书，言东事已定，总署许以五十万充恤赏，并给琅■〈王乔〉建造房屋费。数日来，天气稍晴；余乃亲诣海口，筹船运米。冯安国以起造碉楼至九江坑报，王进良亦以募齐碉勇分布为言；拟山路葺治稍平便于舆马，当亲诣丈量。

十三日，左右两旗及王得凯大清水一哨、陈光华、陈辉煌各军均移营新城河东。新城通事李阿隆等领大鲁阁之符吻等八社番目八人、陈光华亦遣人招到奇莱之豆兰等四社番目来归化，飭营务处周副将分别赏赉有差。闻大浊水、大南澳生番百十成群，时犯戴芝亭营垒；连击却之，创其数人，我军死者一、伤者二。因思自大南澳对山之半另辟一径通大浊水，即可也；沿海履险之虞，于计为得。拟商前军后，再定行止。

十八日，星使书来，亦谆谆以沿途择要建碉为言。特内地新勇未至，兵力日进日单。幸新城以往俱属平地，开辟甚易为力，以专待济师；前途工程，故暂令从缓耳。自苏澳至新城，或云百五、六十里，或云百三、四十里，纷纷莫定。余令陈辉煌分山路、平路，各与丈量；既便给与路工，亦可定其里数。然秋、冬之交，非行三日程，不能至也。「福星」轮船至，开花炮教习洪参将渭涛、秦游击龙标均附之而来，沪尾关饷银亦转运至军，为心慰久之。连接星使书，以倭奴既退，请余早竟开山事。余乃因「福星」轮船之便，尽所藏苏澳之铜炮子药、又备米数百石，檄巡捕何树春载之至新城。是晚船回，言前军之驻新城皆营于三栈地方，陈辉煌则回任修路之役，各军盼望济师綦切。余因遍谕陈光华、陈辉煌等：乘间修桥梁、通河道，路之宽广总以可舆、可马为率；生番之可抚者，亦趁此广为招徕。新军一到，即当乘破竹势而进也。各军之在新城者，言数日前各以其所部十之六前诣奇莱南四社相度地势，以睹番情向背；番见其来者，皆罗拜欢迎入社，杀羊豕具饭以待，愿请归化。周副将犒以银牌等物，欢欣鼓舞而去。谕李阿隆：以新城民番杂处，一切物价必公平如向时乃可。

十一月初四日，冯安国稟：小南澳溪头之麻达简社生番七、八十人乞归化；即飭冯安国务凿通大南澳山半之路，并许以便宜行事，泊令分两哨驻大浊水岭下。

初六日，闻报大南澳不戒于火，焚米、盐数十石垂完，汛房亦被毁；既严檄责之。

前令陈辉煌丈量已开之路，兹据报：自苏澳至新城，计山路二万七千丈；又新城之南至花莲港北，平路九千丈。仿周制以六尺为一步、三百步——计一百八十丈为一里，苏澳至东澳，二十里；东澳至大南澳，三十里；大南澳至大浊水溪，三十里；大浊溪至大清水溪，二十五里；大清水溪至新城，四十五里；新城至莲花港北岸，五十里：通二百里。既以具由通报，并勒石苏澳道左，纪其实、亦志其始也。

星使于十一月之望疏陈「台湾善后事宜」，即有移驻巡抚之议；是又台事一大关键。南路一带，自袁闻柝九月间率绥靖一军越昆仑坳而东，张奎垣派李光领队继之；李营至坳东，袁军乃得拔而前进。自昆仑坳至诸也葛，计程不过数十里；而荒险异常，上崖悬升、下壑胥坠。山皆北向，日光不到；古木惨碧，阴风怒号。勇丁相顾失色，只得中止。当袁营驻诸也葛之始日，正张奎垣在内埔办番之时。内社地有老鸦石者，昆仑坳之西境也；一日，张部左营有五勇暮过其地，草间突起数番，截杀其一、枪伤其一。经都司张欣等派队尾之，已鸟兽散矣。诘诸内社头人，知系七家蚩社凶番。迨二十四日，周参将善初哨至双溪，路见无元勇丁横卧，血肉狼籍；方疑骇间，旋见多番械向山坡狂窜，急挥勇追之。适周守备恩培亦出哨至，要坡前，枪毙其一、生擒其三；余悉散走。讯供：死者曰拉立，擒者曰亚利目、曰苏拉、曰白牛，俱为陈阿修社番，即割路旁勇丁首者。并承左营两勇之死，亦其所为不讳；当经置之于法。既而都司张朝光、张天德分率营哨至大石岩、诸也葛，袁军乃得前进卑南。诸也葛以下地略平坦，但榛芜未剪，焚莱伐木颇费人工；而袁丞累夜露宿空山，感受瘴疠，亦抱恙甚重。星使当以候补通判鲍复康暂领其军，俾归郡就医；前至，而袁丞已舆疾率旅径抵卑南。张天德一军亦趋大猫狸，与之犄角。昆仑左近凶番惩儆之后虽无敢生心，惟山道险远，粮运艰难；而卑南海口当东北风司令，波涛拍岸，倒卷如壁，船难近岸。幸派营分布，声势尚属联络耳。至琅■〈王乔〉一带，自倭兵退后，星使即派淮军两营扎统领埔、王开俊一营扎风港。十月三十日，忽到倭船一只泊龟山下，有五人登岸周览旧营，时许始归。十一月十一日，复有轮船一只泊清港口，西洋五人登岸；经曾辑五镇军阻诘，云系簪文国人。其实西洋向无此国，询诸日意格云：迨「日耳曼」转音之误也。伊等求至新营一观，淮军管带官李常孚、胡国恒整队而出，洋人旋即下船而去。此时倭事虽息，彼族之眈眈于台湾者，尚自未已；非于琅■〈王乔〉建城置吏，无以为永久计。至旗后海口，峭壁洪流，亦台南一大险。前经夏筱涛履勘，商淮军唐俊侯统领凿山垒土，建炮台六座以固海防；唐以候补府田勤生往，十一月之初已兴工矣。彰化之集集街，有着匪陈新妇仔者，平昔借报雠为名，啸聚死党；杀人、扎厝，控案鳞迭——「扎厝」者，乘人无备，纠众掳人、毁宅之谓也。倭事方急，该匪乘间蠕动；官军破围捕之，逃入内山，不能获也。至是，彰化令朱干隆、副将唐守赞擒之于葫芦墩之南坑；亦一

快也。此次淮军之来，重洋涉险，水土不服。文武〔员〕弃物故不少：教谕田晋阶、万嗣伯、参将侯汝志、邵鉴清、游击王维新、都司刘登惠、守备徐宜和、吴维隆、千总田德瀛、卫承元、把总徐万华，凡十有一人；均为请于朝，照「军营立功后病故」例议恤。勇丁故者二百六十余人，请于葬所建祠，春秋官祭：亦褒忠劝士意也。闽厂第十六号轮船成，定名「元恺」——一百五十匹马力兵船也。船工现已接办，亟应购备者尚有三端：一则极大挖土机船计半时可挖土五十方尺，当人工一千余担之多；此则船厂江滨浚深淤泥积沙具也。一则西洋铁制船肋，近以西洋、暹罗、仰光等处曲木日少，罗致为难；易之以铁，所以济曲木之穷。一则旧式轮机，用煤过费。西洋于兵船，则创为卧机，平水面以避炮；于商船，则创为立机，展舱位以取容。合计三项，费在二、三十万金。铁肋则取诸法国，缘闽厂各船皆取法于法；新机必购诸英国，以英船向称坚致，其制度亦较无弊也。北路于十一、十三等日正在开路，突有凶番千余，分段埋伏放枪；我军竭力抵敌，经守备黄朋厚击毙四人，始退。是日，我军阵亡者四人、受伤者十有八人。十五日，至一崇山之麓，众方在峡中开凿，忽枪声四合；抵御两时之久，番乃愈多。黄朋厚、冯安国料众倾社而出，中必空虚；分队捣其巢穴，果有草寮数百阍无其人，见新旧髑髅每寮多或百余、少有数十，秽臭熏人。乘风纵火，焚其社寮十余；阵番始散。是日，兵勇死者四人，负重创者二十余人；而哨长祝荣山胸受枪伤颇重。其驻浊水溪一旅，由小南澳运粮而归；路过石壁，凶番蜂拥包抄，阵亡者三人、负重伤者一人、坠海死者四人。幸守备朱仁彪率队驰援，始各骇散。苏澳五里亭，亦报有凶番狙杀二人之事。余以番族四出云扰，山场辽阔，营勇不敷分布；星使闻，以宣义左、右两营来，未卜何日可到。艚舨制竣哨船五号方抵苏澳，为暴风击沈其一于卯鼻、龟山洋面；幸港船驰救，余均无恙。

十七日，拟以右旗及陈辉煌两军进扎三栈城，节节建碉；仍饬李阿隆募守碉之勇。

二十一日，周维先来禀，谓前途各军营垒既立，专盼济师；而宣义两营又急切未到，焦灼万状。吴标南在大石硿建碉，生番至者二百余人；历已至酉，抵战不退。幸石硿三面死地，祇一面应敌；至夜，伐木代火坐守。至曙，通大南澳，来生力八十余人；番见之，乃遁去。是役阵亡一人、受伤者三人，亦岌岌矣；余立饬冯安国多分队护之。艚舨运到洋枪四百杆，是余浼李彤恩购自香港者。陆提印务，计余莅台已半年，难保无关要事；鞭长莫及，则兼顾为难。不得已，以其情上诸制府，请觅人替其任。艚舨运来犒番哗吱三十端。日来以周树人所募新军乏船莫能东渡，郡中许拨宣义营勇又姗姗来迟。不得已，致书星使；遣都司古春荣赴淡水募粤产为练勇右营，一面筹款济周树人在泉候船之众。是时李制军方驻师泉州，既请就粮台借二千金以资口食，既又由周润斋（中衡）筹措数千金。彼则嗷嗷待哺，度日如年；此则日待济师，急如星火：重洋远隔，亦徒唤奈何而已。

二十八日，以黄朋厚暂领福靖前营之众。

维时连奉上谕，以大学士文祥之奏，谓日本现虽退兵，此后海防亟宜认真整顿；淮军应如何扎郡城、修筑炮台，及铁甲船、水炮台等件应如何购备？北路生番应如何招徕抚恤？着沈葆楨等商同罗大春认真筹划各等因。星使以闽人偷渡台湾，向有厉禁；台民私入番界抽藤、钓鹿、伐木、采棕者，如之。此外，私铁有禁、私竹有禁。盖开山不先招垦，则路虽通而仍塞；招垦不先开禁，则民裹足而不前：此星使所以奏请悉弛旧禁也。台湾额兵七千余人，星使招洋教习授以洋枪阵法，未见成效，徒滋基声；拟将奏请裁撤。丁雨生中丞原议：防海之法，以百艇船不敌一大兵轮船。第装炮至四十余位、装兵至六七百人，吃水过深，不可不预备修船之厂。上下层皆列炮眼，安炮多则受敌之处亦多，且有烟涨舱中之虑；必取外洋大兵轮船之新式者，详究其利钝。木轮船足以护铁甲船，仍不足以御铁甲船；则铁甲船终不能不办也。原议又请精练陆兵，每人月给十元。现时淮、楚各军月饷均四两二钱，魁桀者未尝不争趋若鹜；凡事求其可继，倘为快目前，即恐无以处楚、淮各军云云：议颇公允。又以唐提督定奎统领铭武等军十三营调度有方，请锡章服殊荣，或颁内廷珍异；奏入，奉旨「赏穿黄马褂」，旷典也。有疏请减台煤之税；其略曰：『台地所以为彼族耽耽者，病于土旷；土旷之病，由于人稀。重洋远隔，必利市三倍，而后内地食力之众不召自来。田利微而旷利巨，田利缓而矿利速；故论全台之利，必以煤矿为始基。各省以煤炊爨、以煤御寒，销旺则价昂，价昂则民病；台地则舍出口，别无销路。又煤质松脆，逊于西洋而等于东洋。年来台煤出产虽富，而销仍不畅。盖西洋产煤，金山最伙。自埃及红海开通以后，洋船无须绕过金山；金山之煤遂稀，价亦日昂。台煤所以不旺之故，以东洋之煤成本较轻，独擅其利也。今欲台煤畅销，必减向时税则，故拟每吨减为税银一钱』；并声明南北洋各口不得援以为例，以台煤无关民用故也。据营务处刘兰洲之请，奏调候补工部员外陈一鹤、同知文炜、知县李益林襄开抚事。洋将博郎、哥嘉、都布阿三人，倭事之初，邀其教练水陆各军，与有微劳；至是，为请分别议叙，以酬其勤。前陕西布政林方伯寿图，当倭船驶至虎门，星使又适将东渡，因请以稽查船政为名，坐镇马尾厂地，兼办福州海防；五月以后，周历长门南北岸、川石、金牌各海口，创建炮台，人心以安。林本籍福州，前以服阕，当入都；及是，乃行。据台湾进士杨士芳等之请，为前明延平郡〔王〕郑成功请谥建祠。康熙三十九年，圣祖仁皇帝有诏：朱成功系明室遗臣，非朕之乱臣贼子；飭遣官护送成功及子经两柩归葬南安，置守冢、建祠祀之。然未蒙赐谥，台郡亦未有专祠；故星使援瞿式耜、张同敞追谥「忠宣」、「忠烈」之例，以成功所处尤为其难。得旨报可；圣朝褒忠之典，可谓卓越前古矣。请敕加嘉义县城隍封号，以同治元年戴万生之乱，叨灵贶也。请旨准建昭忠祠，以祀戴逆之乱阵亡文武员弁潘恭赞，林廷瀚、王鹤康、林上达及义民潘缔等，春秋致祭。倭兵之退，前闻中国以五十万金充抚恤，并受其所修建道路、房屋；兹抄来会议凭单，事由英国公使威妥玛说合，以十万两抚恤从前被生番杀害难民之家，余四十万两则留其在台所修道路、所建房屋费也。约定日本以明治七年十二月二十日——中国同治十三年十一月十二日，彼则全行退兵，我则全数付银。另立条约，中有日本国此次所办原为保国义举，中国不指以为不是；所有两国往来公文，均撤回注销，永为罢论。至于该处生番，中国尚当妥为约束，以期不为客航之害云云。其银则由上海

总税务司先给十万，余俟退兵照付：此其大略也。

琅■〈王乔〉筑城设官之举，星使于十二月十三日，始偕周子玉太守、曾辑五镇军亲临履勘；十四日，抵凤山阅淮军——城东三营、城西三营，结构精严，上垛下濠，周方四角突起炮垒，分哨扼守，外瞭旷如、内平砥若，屹然伟观。入营接见统领营官，各加奖勛；并躬奠其病歿将士之坟而去。次日，宿东港。次日，宿枋寮——地本瘠壤，道光间有凤山令曹瑾者开水圳以通泉脉，遂为膏腴，至今民食其利。时已残冬，麦穗、秧针黄绿相间，则内地四月间景象也。此尚凤山壤则之区；过此则皆番社，民居寥寥矣。十七日，过刺桐脚，乡民诉为狮头社番戕者五人，王开俊营长夫亦毙其二；经飭汛弁勒交凶犯。风港倭营俱在，四无墙壁；草屋数十，高仅及肩。王开俊嫌其散不可守，拟合扎而加墙濠焉。十八日，抵琅■〈王乔〉，宿车城——为前大学士福文襄康安征林爽文驻兵之处。晤夏、刘二道，知已勘定车城南十五里之猴洞，可为县治。盖自枋寮南至琅■〈王乔〉，民居俱背山面海，外无屏障；至猴洞，忽山势回环，其主山由左迤趋海岸，而又中廓平埔，周可二十余里：似为全台收局。屋材砖甃，动须运自内地；城濠所值已垦民田，亦不能不量给其价：糜费良多。拟请先设知县一员，俾亲勇一旗，以资号召；其余武员、学官、佐贰，暂作缓图。县名曰「恒春」，亦星使所拟者。车城外西南又有所谓后湾者，倭人旧营址也；滨海当风，水泉恶劣。淮军弃而不取，分营于车城、统领埔以卫居民，而扼牡丹各社之冲。经营既定，又迫岁暮，星使遂同夏、刘二道于二十日旋郡。随疏声请二十四日自台内渡，勾稽船厂历年大数。一去一来，计总在开正后也。

（十二）月朔，就营次为家将军开寿觞。

次日，胥晋卿丈自泉州来，袖到严谕，喜高堂强健；并悉陆提篆务，承制军委漳镇孙庚堂接署。仔肩得释，责任较轻，为可喜耳。大霖二弟亦自沅州至泉，候船东渡。

周树人头起新军，初四日由鸡笼登岸，拟回舟更载二起来。

初五日，冯安国遣人率斗史之廖兴等社番来归化，当赉以猪、酒等物而遣之。

次日，提标差官朱凤仪来营赉陆提印信，连日料理交卸之事。简壮丁，分投安插，亲巡视至山边而返。自刊行营木质关防，分别咨行启用。赏冯安国招徕斗史之麻达简社化番老幼五人有差。二起新军行且至，急制棉衣数百袭，遣人赴鸡笼镇压并分给之。大霖弟之来，乡人从而至者颇众；起自田间，极耐劳苦：均置之亲兵队中，须约束也。弟小住旬日，拟即内渡旋泉，移眷累晋省，更回衢州侍养。

十三日，遣朱凤仪赉印行。斗史之实纪律等社经冯安国就近招徕番目归化者，又四十余。续造碉楼，亦以次告竣。噶玛兰厅条陈开垦事宜，纲举目张，极为周密；四

张文告，特苦久无应者。事关创始，必疏节阔目，与以非常之利，民无不争趋若鹜；所以久无应者，未必非网密之过也。

二十一日，以洪、秦二将官为营务处。冯安国稟：大浊水以下碉堡，皆增树木城。

次日，本拟作兰城之行，阻雨不果。提中军周得富来书，知眷累侨寓渠署；度岁后，乃晋省。周树人报二批新勇已至，「福星」轮船载三批勇亦至苏澳。

次日，传新到各哨长，谕以营规。随致书夏观察：禁绝通事，勿许私入番境贸易。诸如食盐、布疋日用之类，悉由地方官设局懋迁有无；并引通事入局以供驱遣，不得别生枝节矣。

光绪元年（乙亥）正月初二日，命新募之绥远前、后、左、右移营前进。

初三日，「福星」轮船由沪尾至。

次日，携幕客及随员人等航海前行至新城，令周维先率三百人驻后路。余率亲军取陆路，行径大南澳、大浊水、大清水。

初九日，抵新城。

次日，大鲁阁化番十余人来见；晓以大义，众皆唯唯；赏赉有差。旋据陈光华稟：营勇过大清水，有被大鲁阁番要杀之事；亟命通事查究之。出视所在碉堡。至奇来、花莲港，传各社通事，痛谕以恪遵王化，勿许番众杀人；违者死无赦。拟沿途添筑碉堡，遣左、右两旗进营花莲港。得梁礼堂书，惊闻皇上龙驭上宾；未见明文，未便即举哀。左、右两旗至薄之社，闻番众有阻挠语；及遣人谍之，番于我军之至尚夹道欢迎，已扎至花莲港矣。吴霁轩来函，知中路定初九日兴工；拟由林圯埔社寮庄分路入大坪顶，乃合而达茅埔、东埔。我前旗进营三栈城后，勇夫登山伐木，为高山番社戕杀其二。余亲往调查，以不携军械之故——又散漫樵采，致为所害；严谕兵勇后勿尔。洪丞稟：大行皇帝系十二月初五日宾天，海外迟奉诏书，以见蓝印日，先哭临；军民禁止作乐，勿薙发。

十九日，得王玉山南路阵亡之信——玉山于余为儿女亲家，其女为采儿媳也。亟驰书当道，仍催召宣义左、右营来防。出示招居民至新城贸易，有愿开垦者许居。右旗营中人月给饼银二，以六阅月为度。

二十四日，宣义右营至。

二十五日，「福星」轮船载饷银、军装至。右旗来勇报：自花莲港随吴哨长至大坪

林，突出生番五、六十人；勇丁及民人死者六人，受伤者一人。余急率亲兵驰救；比至，已逃入山矣。忿极，令各勇砍伐树木，并派队四棚于彼驻守。彼处树木，大皆合抱，不知其几千万章；以长矛约略丈量之，计一里有余。番之狡狴，最以深林丰草为长技。正在大坪林部署筑垒、伐木事，前旗之在三栈城侵晨汲水及在得其黎者，又报先后各为生番戕者二人。新军之入山者，见番众所在狙杀、又山深瘴重，咸有戒心；脱逃者不少。不得已，严申厉禁；并令冯安国于大南澳桥头设卡讥察，众志成城。

二十七之夜，生番又结队扑我大树坪小营。初闻枪声，即令亲兵衔枚疾走；将至营，又发号数声及震之，小营军心以固。番不知援兵至者若干，亦惊遁无踪。

二十八日，率亲兵携开花炮于对山林木蓊郁之所，轰击数四；以生番所在要杀，故凭空震撼之以夺其魄耳。

嗣得星使疏草，知王玉山以狮头社生番抗不交凶，居民不堪其扰，呼吁请兵；于初八日带同中、后各哨，由枋山溪一路蓐食而进。寅刻，攻破该社，焚其草房。已刻，进攻竹坑，该凶番公然持械抵拒。经阵戮数十人，方谓可以示惩；詎该番先已设伏社外草间，我军以径生树杂，防不胜防，行至七里溪，密菁中枪标蓦起，蜂拥合围；兵勇极力冲突，伤亡甚多。玉山身受重伤，握刀血战，手刃十余贼；直至晡时，力尽阵亡。哨长周占魁等三员，亦同时遇害云云。

星使自得玉山殉难之信，二月初十日即由省东渡；彼时内、外狮头等社结连党羽，在刺桐脚沿海一带伏路伺杀。风港、枋寮等处，道路为之不通。王玉山原部先经檄委准军副将王福禄接带，营务处刘道率朱明登一营并镇海中营两哨驰扎风港；唐统领派提督王德成等先带七营分扎枋寮、南势湖、枋山等处，自于二月初四日统四营扼刺桐脚，以当其冲。据报凶番昼则伏莽狙杀，夜则燎于山巅；我进彼隐、我退彼现，与中原之剿发、捻迥不相同。非随山刊木并严禁附近奸民接济，未免下手为难。况又勾结龟纹等十八社据险为虐，琅■〈王乔〉各社早经帖服者亦因之观望而有异心。现时维有廓清榛莽、按隘设碉，步步为营，层递而入，痛惩一、二社，余社自当慑服；从而抚之，庶几一劳永逸耳。附片并为王玉山声请加恩予谥，于台南准建专祠；随同阵亡之守备周占魁、扬秀举、千总杨占魁及勇丁九十三名，并恳交部从优议恤祀——王玉山不死矣！刘兰洲观察以外艰，请奔丧回籍；星使请以前江西督粮道清泉段观察起代营务处事。闽厂新制兵轮船，前奉谕旨本归余统领；自简授陆路提督，自后遂难兼顾。去年倭事方兴，专派六船至澎湖教练；后将「扬武」改为练船，所熟谙西学堪以出洋艺童荟萃其中。募洋将德勒塞为总习，以精于枪炮、帆缆洋师二人副之。其余各船除出差外，亦随之合操。统领轮船之任，本来难得其选；于熟悉洋务之外更难，正己率属则难之又难。至是，始奏明以蔡提督国祥暂充督练之任。俟周历海上数月，如果胜任愉快，更请作为统领；亦可谓慎重矣。当唐统领之进狮头社也，先是近山树木尚未一律芟夷，凶番仍狙杀无已；后自南势湖

起至刺桐脚止，开路宽三十余丈、直二千余丈，沿途剪薙一清，狺狺者始无所潜伏。既梟示奸谋林正春，并于十八社中访出同恶之内、外龟纹等凡十有二社，因定进剿之路：一出刺桐脚，一出南势湖。十四日，番由刺桐脚要劫出哨淮勇，毙其二人。二十日，我军探路，见山洼茅屋，射一火箭，出番百余；盖外狮头山社之卡也。二十二日，由南势湖探路，缘鸟道鱼贯而入。有番约五百余人突起迎击，士卒攀藤而上，顶踵相摩；鏖战两时，番始骇走。我军乘胜急攻，破其五卡，直捣草山社，克之；焚其寮百区，败番分路狂窜。是役计阵斩十余人，枪毙百余人，夺获器械称是；我军亦伤亡副将杨春荣、游击束维清及兵勇多人。唐统领于山麓廓清之后，督部伍由刺桐脚循溪右边而进。至竹坑山口，芟荆披棘，以一营屯之；自仍循溪而进。直至竹坑山，下为狮头社必由之道；又以一营驻之。绕至山后，曰竹坑埔，距刺桐脚十里，溪广山高；竹坑社在其东南，阿栽米息、中心仑等社在其正东，内、外狮头社在其西北：实为形胜之区，以左军左营扼之。现入山虽深，逐节廓清、连环进扎，自可无他虑。南势湖一路，山溪更险，以铭字中军左营驻之；余仍步步剪除，相机前进。虽满目芜莱，将士辟除异常劳苦；较诸冒险图功、糜血肉之躯侥幸一胜者，又不当以彼易此也：此星使抵台后布置进军狮头社大略情形也。北路所开后山形势，自苏澳起至花莲港之北止，计途二百里；中界得其黎。得其黎以北百四十里，山道崎岖，沙洲间之。大浊水、大小清水一带，峭壁插云，陡趾浸海；怒涛上击，炫目惊心。军行束马扞壁，蹢躅而过；尤深险绝。得其黎以南六十里，则皆平地，背山面海；如悉垦种，无非良田。奈地旷人稀，新城汉民仅三十余户耳；外尽番社也。自大浊水起至三栈城止，依山之番，统名曰大鲁阁。其口社曰九宛，曰实仔眼、曰龟■〈口女〉、曰■〈口女〉沙、曰符吻、曰仑顶、曰实空、曰实仔八眼，凡八社；凭高恃险，野性靡常。奇莱平埔之番，居鲤浪港之北者，曰加礼宛、曰竹仔林、曰武暖、曰七结仔、曰谈仔秉、曰瑶歌，凡六社，统名曰加礼宛社；其性畏强欺弱。居鲤浪港之南者，曰根老爷、曰饱干、曰薄薄、曰斗难、曰七脚川、曰理刘、曰脂厝厝，凡七社，统名曰南势番，男女共七千七百有四人；虽悉具结就抚，而薄薄、理刘二社皆既顺复贰者。除薄薄一社知煮盐、加礼宛一社颇耕种，余悉茹毛饮血之伦，叛服不常，时当防范。论他日建城之地，宜在奇莱；若新城、三栈城、马邻、鲤浪，不过营汛之区；尤必截大清水以南隶奇莱、大清水以北隶大南澳，方足资控制也。现拟自苏澳五里亭起、迄秀姑峦之鹊子埔，计地三百四、五十里，区分五段；沿途建三十二碉，各派营哨屯之，俾一气联络。而以新到之宣义左营驻三栈城，策应鹊子埔以北；宣义右营驻加礼宛，策应鹊子埔以南：此花莲港以北筹办之情形也。花莲港以南，为走秀姑峦之道；固木瓜番游猎之场也。登高远望，平沙无垠；茅苇盈丈，人迹不到。盖以该番凶恶不亚斗史诸社，故沃壤旷如。

南北港道阔及三十余丈，欲造正河木桥左近，苦无巨材；因先建支河木桥一道。军功陈辉煌业率所部结筏以济，直趋吴全城；该处离秀姑峦祇数十里，当时即有成广澳之番目、秀姑峦之通事来营乞抚。其中别有大吧笼社、吗咤唵社，皆附近强番；节经设法招抚，番目等各率耆老、丁壮由通事引至新城归化，各赏酒食而归。平埔之番，闻已尽此。平埔既附，专图高山，似事势较易：此花莲港以南筹办情形也。

中路吴霁轩镇军至正月之底，即开七千八百三十五丈有奇。二月，由顶城开工，直抵凤皇山麓；跻半山、越平溪、经大坵田、跨扒不坑等处而入茅埔，计又开路三千七百七十五丈有奇。凡建塘坊八所，沿途桥道、沟洫、木围、宿站俱渐兴修；分派兵勇自集集溪起，至社寮、大水窟、大坵田、茅埔、南仔脚、蔓东埔各要隘，已逐节配扎。又送到查抚水里、审鹿等三十九社名册，计归化番丁、番口凡七千二百九十二人。辰下方循途渐入，斩棘披荆，以出秀姑峦之背；倘能因势开道，将与北路诸军联为一气矣。

初二日（？），前旗勇三人，遇三十许生番于大坪林；我军所携祇一枪、一刀，既毙番一人，番复拥至，连发五标伤数番，乃得脱，衣裤尽穿。余传至，慰劳而重赏之。

自余躬率大队入新城，添设碉堡；番众骤生疑虑，来营要求子药。未经允给，遂呼聚悍党，昼则伏莽，夜则扑碉。节经各营奋击，时有斩获，稍息窥伺；丁勇等因伤亡数十人。最狡者，正月二十四、五、六、二月初五、六、七、八等日，大鲁阁番竟敢纠众数百扑我新碉；弁勇一面力拒，一面兴筑。余亲督炮队驰援，番族伤亡颇多，始行败窜；我勇阵亡者亦二十五人。迭经惩创，番情始觉稍定；拟招加礼宛生番百二十人为壮丁，归绥远右营约束。余以旧疾复作，颇形委顿；因传唐副将守赞来营，拟以行营事属之。外委陈维礼护饷至小清水石空仔稍落后，为番所乘，死之；护兵、长夫死者数人。林朝选领泗波峦以南之隅眉坡、石关等十八社生番五、六百人来归化，周维先亦率加礼宛头目来谒；均抚慰而遣之。

十四日，接省信，知眷累已抵会城。拟分所部各营分前、中、后三段，以责其成；以唐副将经理营务处。连日偕周树人巡视三栈城、得其黎一带碉堡。周维先率南势等社化番百余人至，犒以酒、肉、哔吱、羽毛等物，宿之营门外穹庐中。余以病势日增，拟出噶玛兰就医。

二十日，亲劳周树人之军，即就彼分别咨移邮递而行。苏澳为台北偏隅，久为王化所不及；非渍之以诗书之泽，无以作其向上之忱。因倡捐洋银五百饼，以为义学之费；并咨夏观察以其前建屋宇，改为学所。星使前议台湾移驻巡抚之疏，闻经部议覆准。飭各营旗领米存贮，备转运不继；仍令各军随所在诛茅伐木，杜番害。病甚，函请星使亟以觅替人；以所余军实及犒番物事付唐副将，飭将建大坪林碉堡。择地新城建昭忠祠，祀开山伤亡将士。星使、夏观察迭以书来相慰，请静心调摄，勿萌退志；内山善后及垦荒诸务，意非余莫能始终其事。余以病势日剧复之。马伏波睹海上砧鸢，不禁惻然兴感；精力无以为继、壮志随以潜消，亦势使之然，不可强也。

初七日（？），勉会福锐左营演炮于三栈城。

初九日，得星使书，属出山就医。是日，偕幕友、随员至自新城行。

台湾郡城周围二千七百余丈，垛坎三千九百六十有八；分设八门。上年六、七、八等月以暴风猛雨，内外垣倾圯一千余丈，垛坎、炮台、炮房亦坍塌不少；至是一律修整完固，并添筑火药、军装等局二所。前随王玉山进攻狮头社失利之哨长李长兴、李玉贵，先因未能策应，撤差候办；及是，李长兴竟尔潜逃。追获后，星使即置之于法。李玉贵仅褫职，不准投营。提标前营外委陈维礼，前以护饷中伏阵亡，未为请恤；兹乃并随营病故之副将李东来、守备时荣贵及先后阵亡伤故病故兵勇九十六名，遭风淹没勇丁三十二名，汇案奏恳分别议恤，并附祀昭忠祠——后均奉旨「如请行」。前奏飭洋将日意格归国采购挖土机船等件，重洋万里，前导有人。往时本有遣发艺童出洋之议，乘此遴选生徒，偕同涉历欧洲，开扩耳目；既可以印证旧学，又可以增长心思，于船政未必无益。经星使于船厂前学堂内选出魏瀚、陈兆翱、陈季同等三人，后学堂内选出林泰曾、刘步蟾等二人，随同日意格游历英吉利、法兰西等国；俟机船铁肋新机购便时，仍随日意格同归：亦一宗妙举也。

淮军之规狮头社也，三月十七日拟进攻竹坑社，料番众必有埋伏；谕派提督张光亮一军出竹坑山前，游击陈有元、何迪华、副将宋先聘分左右两路步步哨探，攀山而进。又以总兵章高元、知府田勤生之众拊竹坑山背，以绝外援。张光亮等行入菁丛，伏贼突起；我军用连珠阵法且战且进，毙番十数。将士乘胜捣其巢穴，抄出鸱芋数千斤、枪矢刀斧数百件、骷髅数十颗。其社正据竹坑山巅，东望阿栽米息、中心仑，南瞰风港、刺桐脚，俱朗若列眉；仍飭陈有元分一哨扼之。特其社下距竹坑埔尚七里，中隔重山；虑仓卒际信息骤难相闻，又飭何迪华分一哨踞其适中之山以联络之。入山来，砖石、版筑皆难咄嗟立办；因挈麻袋数万，随在囊土立壁，番族颇望之气夺。竹坑布置就绪，仍督将士循大龟纹溪向内、外狮头等社开路。二十三、二十五等日，凶番出扑数均数百；张光亮、章高元麾队迎击，先后阵斩、枪伤数十。我军乘胜入砦，焚其草寮五、六十区；询诸土人，盖龟纹所属之本武社也。二十七日，官军筑垒于溪左之大桥头；剪辟草莱，为进取计。其南势湖一路，经提督王德成等沿途开通，日有凶番四、五百人挠我进路；焚其草寮百余，番乃筑石台为久据计。四月之初，唐统领亲登绝顶，见狮头社正面无径可通，仍飭各营循龟纹溪剪辟而进。初三日，张光亮正相度营址，忽凶番二、三百隘地相逢，短兵夺击。鏖战两时，伤番数十；副将马加银、游击张贤扶均受枪伤，勇丁受伤者六。初四日，宋先聘营其山巅，龟纹社之接济始梗矣。南势湖一路，又派刘朝林营其狮头山背，去外狮头社仅二里；访闻大甘仔力、周式滥等社皆萃居外狮头社，垒石墙、插鹿角、建望台、竖哨旗以守。我军迭次阵斩悍番二十余，轰伤百余；兵勇伤亡亦数十人。将士忿极，各思灭此朝食。而兼旬不雨，酷热如内地之六月；张光亮、王德成、章高元感受岚瘴，病莫能兴。张光亮竟于十四日歿于营次，知府田勤生代领其众。十五日，唐统领面授机宜；次日子时，衔枚而进。统领自督亲兵为中路，陈有元为左路、宋先聘为右路；而以副将毕长和率一营伏于山后，以断龟纹社救援，田勤生领队继之。何迪华一营扼山冈，断外狮头社往来之道。东方未白，中路之兵已过三

卡，阒无其人。至第四卡，番乃呼啸迎拒，枪炮雨集；而陈有元、宋先聘已由左、右逾岭轶至山巅，卡番扰动。中路遂乘锐猛攻，连破坚卡，与左、右之师合捣贼巢；番依然负险死守。龟纹社凶番闻信，果以二百余人前来；遇伏而溃。毕长和、田勤生仍留哨设伏，另分兵由山后遶出，与中、左、右三路并力合围；自卯至巳，贼砦始破。计斩悍番六、七十名，轰伤者二百余人，夺获枪刀三百余件；余番向龟纹社而窜。何迪华追抵风吹岭，始还。剿外狮头社者，亦分三路齐进，连破五卡；攻克其社，毙番百余，所获刀枪称是。合内、外社共焚毁草寮三百余间；一鼓作气，战功可谓神速矣。星使以余迭次之请，为附片恳恩赏假两月，出山调理；调福宁宋魁五镇军（奎芳）代其任——宋，余同乡也。管带福锐左营副将周维先三月初一日病故新城，陆提右营裁缺把总杨飞高亦于十七日在营病故；经星使汇同训导蔡秉钺、盐大使吴霖森、巡检阮经标、从九品章坤等，请以原官均照「军营立功后病故」例赐恤。四月二十日，淮军营务处知府田勤生于内狮头社左近密菁竿抄得王玉山首级，面目凛凛如生；饬曾随剿番之千总郭占鳌及其旧部兵勇环列谛视，莫不搏颡下泪，叹为鬼神呵护。盖自殉难至是，已百余日矣；忠诚所感，卒归其元，可敬也。各军既攻克狮头等社，各番众知负隅难恃；〔五月〕初九日，率芒〔社〕晋笏、姑益翼、沙背、取雷、姑鳅、董的〔社乌力烈〕、南片〔社姑令〕、草山〔社〕土结、笏朗等番目先后到营乞降。十二日，枋山民人带至内龟纹、外龟纹社番目，又有射不力社番目带至中纹社、周武滥社散番百余，唐统领示约七条：曰遵难发、曰编户口、曰〔交〕凶犯、曰禁仇杀、曰立总目、曰垦番地、曰设番塾；以龟纹社首野艾向为诸社头人，拔充总社目统之。番社后有杀人，即着总目交凶犯；三年之内，各社能无擅杀之事，即优赏总目。狮头社余孽窜伏何社，即由何社跟交。野艾及各番均愿遵约，随改名竹坑社曰永平社、本武社曰永福、草山社曰永安、内外狮头社曰内外永化社；胁从各社均许自新。惟狮头社不准复业，由总目另招屯垦，以昭炯戒。于枋寮先建番塾一区，社各选番童三数人学语言、文字，以达其情；习拜跪、礼让，以柔其气。各番闻之，无不俯首帖服。时王中丞凯泰正奉命渡台，与星使公同参酌，拟狮头社一案须如此收局；盖当时易抚为剿，事势逼使之然，原非得已。惟狃獠之性初就范围，不能不先与坚明约束，以后乃可徐与渐摩也。管带兰军提督高登玉协同在事文武在北港仔地方，当场格毙新厝庄积匪蔡显老等二名；又搜获蔡波等二名，均就地正法。台北一带，自前队开抵吴全城，诸军遂拟一路联扎而入；无如初辟之区疫气流行，兵勇病者甚众。加礼宛之番唆动七脚川诸社背其老番，乘我军病疫，各谋蠢动；余乃传集各社通事穷诘实情，宣扬国家威德，切实晓谕：伊谋乃息。又见我军方汰遣病羸、添补精锐，戒备森严，愈形惕息。惟大浊水、得奇黎、新城一带凶番，仍不时出没。是月初七、八、九、十二等日，分起四出，所在肆扰；官军斩获颇多，以后尚觉安谧：此花莲港以北之情形也。花莲港之南，经周树人派弁译造木瓜等社、大巴笼等二十社、马达安等四社名册，通共二十九社共丁口万七千七百十有九人；中惟木瓜五社狡悍异常，余较驯善。中路一带，自三月初九日起、至四月初八日止，由茅埔越红魁头，经头社仔坪过南仔脚蔓至合水止，统共开路四千六百八十丈，合计二十六里有奇；递建塘坊四座、茶亭二所、大小木围二座、公所二座、小营垒二座，以便往来。续自合水起，历东埔社心，走霜山横排

至东埔坑头止，又开三千七百九十丈，计二十一里有奇；塘坊、石桥、木栅、土围称是。另从〔牛〕轡旁开一道，侧接茅埔，以便分达埔里、集集、社寮、南投各处，使商旅时通。卑南一带，袁丞闻柝方招集屯丁建筑碉堡，为经久之计；内埔、昆仑坳、诸也葛等处，张镇军仍驻营弹压。时星使奉命补授两江总督兼充办理通商事务大臣，方具折吁恳收回成命。复奉上谕：以李节相督办北洋海防、沈葆楨督办南洋海防，所有练军设局及招致海岛华人诸议，统归择要筹办。铁甲船如实利于用，即先购一、两只。开采煤、铁事宜，着先在磁州、台湾试办。出使各国及通晓洋务人材，并着随时保奏。台湾开、抚事宜，应否奏派大员经理？速行具奏各等因。时王中丞已于十七日抵台，经覆奏归其专办，以夏道辅之。先是，朝廷鉴于倭事并因总理衙门六事之奏，通飭中外各抒所见；故自大学士、九卿、六部外之封疆大吏各有所建白，后经诸王大臣复议具奏，始重其权于南、北洋两大臣。凡此次上谕所举各事，皆引申六事中条目也。

台南番社，次第就抚。五月以后，中心仑、妈梨也、阿栽米息、大笼藕、谢阿阁、龟仔笼藕等社番酋陆续向化者颇众。有率芒一〔社〕与北力力五社素不相能，恐复彼此成仇，因遣人分投劝谕，俾释前嫌。并在刺桐脚设立招抚局，清查各社户口，编给腰牌，令其一律知法。该番裸居习惯，自见受抚番酋赏穿衣裤，各萌媿耻，竞慕冠裳；时时来局，请颁衣裤学制。中纹、永化二社，各送番童来入官学。抚局之成、向化之渐，于兹可覩其概。惟淮军自去秋渡台，艰苦万状，物故不少；甚则一营中无病者，仅二十七人。大支劲旅，有关国家元气，不可不更番休息；经商唐统领全数移回凤山老营，以待内渡。内山招抚事，则归诸袁丞闻柝及张奎垣镇军。以朱明登、王福祿两营留扎刺桐脚，郭占鳌一营扎南势湖，调提督高登玉、副将李胜才兰军两营扎琅■〈王乔〉；另调在省之王荫南、林福善两营来台候遣。先撤淮军染疫最重两营回凤山，余则陆续凯撤；预派船政官轮船到旗后装载，济以洋轮船，俾将迅速。星使以台北口岸四通、荒壤日辟，拟建府治统辖一厅、三县；其略以台湾自康熙年间收入版图，乃设府治领台湾、凤山、诸罗三县；诸罗，即今之嘉义也。雍正元年，辟彰化一县，并设淡水同知与知县同城。雍正九年，割大甲以北刑名、钱谷归淡水同知，改治竹塹；自大甲溪起、至三貂岭下之远望坑止，计地三百四十五里有奇。嘉庆十五年，复以远望坑迤北而东至苏澳止，计地百三十里，设噶玛兰通判。由噶玛兰抵郡城，十三日始达；由淡水上抵郡城，亦七日始达：而政令皆统于台湾府。当淡水设厅之初，不特台北三貂等处榛莽四塞，即淡水南各社亦土旷人稀；今则村社毘连，荒埔日辟。兰厅建〔治〕以后，由三貂岭遶至远望坑，复增地数十里有奇：其土壤之日辟不同，有如此者。台北海岸，前仅八里坌一口；今则新添各港口，曰大安、曰后垄、曰香山、曰沪尾、曰鸡笼。而鸡笼、沪尾港门宏敞，夹板轮船帆樯林立：其口岸之歧出不同，有如此者。前者台北幅■〈巾员〉虽广，新垦之地土著既少，流寓亦稀；百余年来休养生息，前年统计户口，除噶玛兰外，已四十二万有奇。近与各国通商，华洋杂处，稽查尤难：其人民之生聚不同，又如此者。台地所产，以靛、煤、茶叶、樟脑为大宗，而皆出于淡水北。比年荒山穷谷栽种愈盛，开采愈繁；中外总集，风气浮动。同知半年驻竹塹衙门、半年驻艋舺

公所，相去百二十里。况由竹塹而南，至大甲淡属六、七尚百余里；由艋舺而北，至沪尾、鸡笼尚各数十里。命、盗等案层见迭出，分身无术，枝节横生：其驾驭之难周，又如此者。淡、兰文风，为全台之冠。乃岁、科童试厅考时淡属六、七百人，兰属四、五百人；而赴道考者，不及三分之一：无非路途险远，艰于资斧所致。而词讼一端，则四〔民〕均受其害，案经控府奉提，纵昭雪，家已为破；若不准提，一为胥吏把持，便无可控诉。械斗等事，大半萌蘖其中。至徒、流以上罪名，展转解府，淹滞岁月，赔累不貲，则消弭不得不巧。官苦之，民尤苦之：其政教之难齐，又如此者。况去年已来，自噶玛兰之苏澳起，抚番开路至新城二百里有余，至秀姑恋又百里有余；倘山前之布置尚未周详，则山后之经营何从措手！故就今日台北之形势策之，非区三县而分治之，则无以专其责成；非设知府以统辖之，则无以挈其纲领。艋舺当鸡笼、龟仑两大山之间，沃壤平原，两溪环抱；村落衢市，蔚成大观。西至海口三十里，直达八里坌、沪尾两口；并有观音山、大屯山以为屏障，且与省城五虎门遥对：非特淡、兰扼要之区，实全台北门之管。于该处创建府治，即以「台北」为名；自彰化以北直达后山，胥归控制，仍隶于台湾兵备道。其附府一县，南划中枋以上至头重溪为界，计五十里而遥；北划远望坑为界，计一百二十五里而近。东西相距五、六十里不等，方围折算百里有馀：名之曰淡水县。自头重溪以南至彰化界之大甲溪止，南北相距百五十里；其间之竹塹，即淡水厅之旧治也。拟裁淡水同治，改设一县，名之曰「新竹」。自远望坑迤北而东，仍噶玛兰厅之旧治疆域；拟设一县，名之曰宜兰县。惟鸡笼一区，以建县治则其地不足；而通商以后，竟成都会。且煤务方兴，末技之民四集；海防既重，讼事尤繁。该处向未设官，亦非佐杂微员所能镇压；若事事受成于艋舺，则又官民交困。应改噶玛兰通判为台北府分防通判，移驻鸡笼以治之。至苏澳以至奇莱，现时营堡为固；将来田亩开垦，商民辐辏，应否设官？随时酌定云云。计虑深长，规模隳括；开物成务，非胸有成竹，正未易孟浪置喙也。台北煤利之兴，洋师直翟萨到后，到处周历，惟鸡笼附近之老寮坑、深澳坑、大水坑、竹篙厝及暖暖附近之四脚亭、大坑埔、极去枢冲等处煤质尚觉坚美，开采亦便；并须择煤层深厚之处，方期经久、省费。然必购买洋制凿山钢钻，并雇洋工，始便开坑耳。南路理番同知向驻府城，北路驻鹿港；今番境日辟，交涉事件日多，必将南路同知移扎卑南、北路改为中路——移扎水沙连，庶无鞭长莫及之虑。星使因夏观察之请，为之转奏；并请敕铸关防，以资信守——善举也。为准军提督王德成请恤典，即前此在枋寮营次病故者。请下湖南巡抚饬刘道璈葬事毕，克日来台。

星使议台北添建郡县外，尚有「通筹全台大局，抚番、开路势难中止」及「台地营伍积弊，拟请裁汰并练，酌改营制，总归巡抚节制」两疏。其一曰：『台地自去年倭人启衅，外假复仇、内图占地，狡谋已露，逆焰方张；不得已，而有抚番、开路之举。当时固谓海防未固，则外侮难消；山险未通，则海防先无从下手。盖台湾四面环海，前山各口消息尚能探悉，岛岸尚可周知；后山则途径不通，人迹罕到。但谋前山拒虎，一任后山狼进；虽日事筹防，而防务究无把握。人第知今日开山之抚番，固不知今日抚番之实以防海也；人第知预筹防海之关系台湾安危，而不知预

筹防海之关系南、北洋全局也。去夏以来，调派诸军分为三路，锤幽凿险，深入遐荒；剿抚兼施，恩威并用：无非藉拊循之政，折奸宄之谋。近者芟夷修辟，虽日起有功；若欲尽番壤而郡邑之、取番众而衣冠之，必非一朝一夕所能致。故倭事虽已顺平，而各路之师至今不可撤；其费用之数，转踵事而日增。淮军虽已凯旋，而各路分布之勇约三十营，兵力犹嫌单薄，军饷业已不资；然尚有常额也。既防海，则炮台有费、城邑有费、轮船有费；既开路，则桥梁有费、亭坊有费；既抚番，则碉堡有费、赏犒有费。悬崖斗绝，粮道维艰；则储运有费。荒谷招耕，农民裹足；则垦本有费。其余棚帐、军装，则有岁更之费；瘴疠痍伤，则有医药之费、赈恤之费。似此者不一而足，俱难裁减。论者每谓后山精华停蓄日久，奇珍瑰宝，充牣其间；蛮荒之区，实天府之国。果尔，则一时动款，转瞬即可取偿；前人当有先我行之者，不待今日矣。今者北路已开抵秀姑峦，南路已开过卑南觅；中路所开，亦将越霜山而东；蔓草荒烟，萧然在目。而所谓金沙、银矿，都属影响之谈；即使有之，亦苦费人力煎炼而成，所得不偿所失。非无材木也，出运不得津涂；非无煤矿也，挖取尚须机器。若谓新辟之壤，即不固之仓；臣等断其必无此事。夫既创办之甚难，而又无利源之可浚；当此帑项支绌、疫疠繁兴，必有谓以不急之图劳民伤财，殊非善策者。臣等经营后山者，为防患计，非为兴利计。为兴利，尽可缓图；为防患，必难中止。外人之垂涎台地，非一日，亦非一国也；去岁倭事，特嚆矢耳。自法郎西据安南、英吉利据印度、新加坡等处，南洋各国渐为所收；遂使远隔数万里之豺狼，得以近吾卧榻。年来中国各口，异种杂居，蔓不可图；近复闻云、贵等处有陆路通商之请，推波助澜，且浸寻而未已。以台地闽左藩屏、七省门户，天气和暖，年谷易成；后山一带，我不尽收版图，彼必阴谋侵占。迺来番社深险之处，皆有游历洋人来往传教、绘图山川，萌芽已见。涓涓不塞，恐成江河。引类呼群，日积月盛。其轮船，足以迅接济；其炮火，足以制生番；其机器，足以尽地利。我今日所谓「瓯脱」，彼他日皆可以成都会；根株已深，图之曷及！后山一去，前〔山〕何可复守！台地，皆中土之藩篱也；藩篱既撤，则■〈施，虫代方〉蜴之毒，将由背脊而入我腹心。今日犹云借地以居商，他日竟与我分疆而对峙。言念及此，为之寒心！所以早夜筹思，欲杜发械戕篋之机，不能不为塞向瑾户之计。夫澳门片土，自明臣林富割居西人以为苟且之谋，遂贻今日无穷之患；此辙何堪再蹈！臣等亦非敢谓防海之事，尽于开山也。山尚未通，即海何可防！欲致力于彼，不得不先事于此。果使饷源常济，趁此事机渐顺，一气呵成；迨至荆棘日剪、聚落日多、物产日兴、犵獠日化，又未尝不可收其地入以应常供，特非目前所能取必耳。至台地南北前后周围二千余里，地气迥异，情形不同；虽路渐通，其中应办之事，宏纲细目，非一时所能臆揣。仍俟臣凯泰亲历南北各路，细心察看；随时会商奏闻，逐渐布置。至巡抚有全省应办事务，重洋远隔，将来必有议分省以专责成者。以形胜论之，荆、襄江北也，而必隶于鄂；徽、池江南也，而必隶于皖。跨越控制形胜，乃有全神划而分之；脉断则全神俱失，划江而弃淮，淮弃而江不可守矣。以事势论之，台湾之饷源、人材，皆取资于省会；而省会之煤斤、米石，亦借润于台湾。畛域分而呼应不灵，不特巡抚束手，一省而断其左臂；倘海上事起，总督亦必有制肘之时。况自去年五月以来，凡台湾所需，取办于船政者十盖八、九。臣葆楨去台后，必有

接办船政之员；所以代台湾用转者，一如臣葆楨在台时，于台事方无窒碍。若另设一省，恐船政不能联为一气，将事事皆窒矣。省、台兼顾，重洋跋涉；臣凯泰非不知往返之烦也，行乎其所不得不行也』。其所议兵制：台地除澎湖两营外，尚有十五营。拟仿淮、楚军营制归并，以五百人为一营。将南、淡、嘉义三营调至府城，合府城三营、安平三营为一支；专顾台、凤、嘉三县。其北路协副将所辖中、右两营，合鹿港一营为一支，专顾彰化一带；艋舺、沪尾、噶玛兰三营为一支，专顾淡、兰一带：认真训练，扼要驻扎。换班固多疲弱，而就地招募亦利弊参半。既巡抚来台，营伍自应归其统辖。千总以下，即由巡抚考拔；守备以上，仍会同总督拣选题补。台湾镇总兵，亦应撤去「挂印」字样；并归巡抚节制，以昭画一。台城以安平为屏蔽；安平向设台协水师副将一员，所辖三营中、右两营都司驻安平，左营游击驻鹿港。现拟改为陆路；府城有巡抚董率、且有道员随同办事，总兵拟请移扎安平；即将安平协副将裁撤，以镇标中营游击随总兵驻安平。其台协水师中、右二营都司，改为镇标陆路左、右二营都司；原设镇标左营游击，改为抚标左营游击，随巡抚驻台。其抚标原设两营，仍行驻省；改左营为中营，即中军参将领之。原设台协水师左营游击，改为台湾北路左营游击；归北路协副将管辖。守备以下弁兵额缺，均仍照旧。并请以巡抚兼理台湾学政。先是，岁、科两试本归巡台御史兼理。乾隆十七年，御史裁撤，乃归巡道考校；达部事件，呈学政转咨。至是，文武均大更张后，经部议皆如请行。

夏观察文来，请裁撤宣义右营，调左营驻彰化。余以左营未便遽撤，右营如所议行；并饬留精壮补各营旗之缺。宋奎五镇军遣邵参将得胜等由内地率余勇三百人来苏澳，随令赴新城、花莲港；分拨福锐左营、福靖前绥远四旗，以补其缺。

十三日（？），英国有兵船避风至苏澳；当告以后山地方新开，尚未设官，生番不通情理，切勿登岸。盖外国兵船向有巡洋者，此船即常至鸡、沪各口者也。复夏筱涛书，论后山兵勇此时可增而不可减；否则，有土地而无人民，则其地终非吾有。无论余去、以宋奎五继之，必请增益兵力；即后之代宋奎五者，亦必不易吾言。行将言别，不得不以实情告。盖因当事难于筹饷，动议损兵；其实万不可损也。定洋蚨之价：苏澳员钱千百四十文、新城□四十文，必均平市易，始便流通也。报五里亭生番复有杀毙樵民之事；路西碉堡林立，突于路东为扰，番之出没不易防也如此。面苏澳一山，前已树碑记开辟后山大略及道途里数；近复建亭其上。闲与邵参戎浏览山川、痛谈时事，不禁感慨系之！荒山片石，向后固不知于岷首何如；而论年来披荆剪棘之劳、宿露餐风之苦，半生精力、一腔热血，几于此寥落一隅消磨殆尽！留兹雪泥鸿爪，当不使涧壑林惭也。

二十九日，宋奎五乘「琛航」船至苏澳。

八月初一日，卸统领台北事于宋奎五。

初三日，登舟展轮。是晚，抵鸡笼。得星使书，以前请开缺之文已为转奏。

八月十四日，奉上谕如所请开缺，回籍调理。

附录

附录一

上制府请经理台湾后山番地

上制府请经理台湾后山番地

敬再稟者：台湾雄峙海中，背东、面西，为内地七省屏藩。各口泛海之船，一航可达。设有他虞，沿海七省皆不安枕；昔人言之详矣。迩来台、内各海口俱准外洋通商，轮船、夹板任便往来，几如中外一家；履霜之戒，不止于台湾也。

台地自康熙年间收入版图，隶天府者已二百年。嘉庆中，开辟噶玛兰，由北境转拓而东，已有全疆之半。若能包举后山生番归化，尽有东向沿边之地，则其地大于福建全省。道光二十余年间，刘制军奏开水沙连，于巡台之便，亲历履勘，有应设侍郎总理之议。水沙连者，在嘉、彰内山，为生番精华之地；得其地，台疆并有十七，尚余二、三分番界，不难以次招服。侍郎者，巡抚之加衔；盖以为创成海外一大省也。当时虑开边衅，廷议沮之。我国家幅员之广，亘古未有；蠢尔遐荒，何烦规尽！倘使经理不善，利不见而害已成；其沮之也固宜。惟台湾本鲜土著，所谓百姓者，皆漳、泉、粤籍之民。其初地广人稀，米皆内运；福、兴、泉、漳各府赖以接济，尚可输售江、浙。近些二十年来，内运之米渐少；不有洋米，早经□救。虽边疆多事，而民食有资，亦造物者之隐为调剂也。今台湾生齿日繁，渐形地绌；有时米价之昂，过于内地。歉收偶亦有之，其故实由人满。再过数十年，食者愈众、生者愈寡，不岌岌乎可虑哉！不特此也，外国通商洋船往来后山，海路渐熟；夹板船自台至省，并不径渡横洋，必先自南环东遍绕后山，转至极北之鸡笼，一直抵省。内地商船，从来无此走法。又洋船自江、浙径往吕宋诸国，先过台湾后山，至凤山极南之沙马崎头洋面，向万里长沙之外对准南驶。此时台湾后山海道，中国商船所不至者，洋船已成熟路；生番悍而无知，遇有停船取水，难保不无劫杀。中国要认回自办，该番本不服化，无可查拿；欲将就理偿，此端又不可启。若以不隶版图之说直覆洋人，彼将举兵攻击；番众震于炮火，迫入里山，反与吾民迫近。鲸鲵肆于外而蛇虺窜于内，抑若为之前驱，非海外安全之道也。后山土沃宜田（山水清胜，不下于浙之西湖），煤、磺、樟脑、五金、木植等物出产饶富（地灵不终秘，此亦自然之理），洋人万里跨界，到处垂涎；况于徼外之地，原属取之无禁。设有一国得手，于后山开创埔头，则众国效尤，争相盘踞，始而海滨、渐而腹里，得尺则尺、得寸则寸，与中国合境而治；其尚得安枕耶？祸患未形，则亦已矣；倘有萌动，不过历时一、二年，其势不可收拾。若全地早为我有，带砺山河，皇图永奠，足消觊觎之萌；极甚者，不过准与通商。纵犬羊难与力争，而尊俎犹堪理折。故后山之宜开、生番之宜抚，在昔为益地以养民，在今为正名以防患。不为封疆所系怀此隐忧，何必于无事之中求其有事！生番虽则嗜杀，绝无战功，目为边衅，亦不知其竟

而崇视之者也。惟开垦易于聚匪，患不在番而在民。上古之世，鸡犬相闻，老死不相往来；生番之在后山，以生以养、以耕以食，安其椎鲁，与世无竞，斯亦天地之所包容、皇仁之所覆被。一旦以虑患之故，强令归诚；令之不从，保无杀戮；岂不大伤天理！是必慎重以图之、设法以致之，期于事出万全而后妥为。经理大要，仍自水沙连办起。因势利导，流、土并用，即以隶之道、府，不必尽设郡、县；务使番众安心，不虞失所。民承垦地，各有限制。因陋就简，无事于张；一切政教禁令，不必尽符内地。如水就下，顺其自然而规折之；鸿蒙未泄之气，渐久自循王化。若湖广、黔、滇之改土归流，不免多增杀孽；今且非其时也。

再，洋人机诈用事，旦晚不可测度；犹恐衅起仓猝，捷足先登。目前济急之方，自须有以策之。查台湾近山人民，有惯走生番、习其言语情俗并娶番女为妇者，名曰「番割」；应当不惜重资，收为我用。其熟番屯丁，亦有可用之人。均各赏给顶戴，充作官人；使其常往来于生番各社，以生番所喜茶、烟、盐、布等物恣其交结。一面添置火轮船，常川巡至后山。遴派干员前往，广以财物犒赏番目；并调度番割人等分投联络，使洋人视为中国官员常到之地，有如属我抚治者。然彼如窃处口岸，即当以理却之；并请总理衙门力为持论，勿予通融。设遇生番劫杀洋商，既经布置线索并能官履其地，亦可随宜权变以覆洋人，使无借口；不犹愈于望洋徒叹，无从措手者耶？何况开辟抚绥，肇端在此；不由通达番情，何以能凭空招致！

废斥之余，曷敢轻言建白；且系改省人员，无所用其干进。惟静以观动，有所见及，似于海外岩疆未始非思患预防之道。事涉通商洋务，理合附禀大人密存查察。谨肃具禀，恭请勋安；伏祈垂鉴！

按此禀，丁卯四月十九日申呈。同时接总理衙门信，以洋人垂涎台湾后山，谆谆嘱咐；并谓「凤山生番杀毙洋商一事，切勿使洋人自行往办」。书中词意，认是故人手笔，所见不谋而合。今花旗洋商在琅■〈王乔〉造屋，以旗号付头人，导引入山；并以资物交结番社，通其情好。花旗如是，英、佛定不相让；数年之后，台事棘手可知。近有以后山处置事宜问于东瀛老吏，亦谓多用走番之人往来联络，以示为中国固有之地，别无他法。前禀切合时事，存此以俟轺车，亦江湖魏阙之深意尔。

附录二

淮军平定台湾番社纪略

台湾地势番情纪略

淮军平定台湾番社纪略方浚颐

粵寇之平，湘军而外，以淮军为最；淮军之中，又以铭字营武毅军为最。同治十三年，东倭与台湾生番构衅；合肥相国奉天子命，檄调今福建陆路提督军门唐公定奎往治其事。时全军分驻徐州宿迁，以渡海马队非所宜，因专统步队十三营为援台之举。七月初八日，军门亲率亲兵、正营、左军三营为头队，乘火轮船南下。十二日，次澎湖，有倭船同泊；意来觐虚实也。十四日，抵台湾凤山县西北十八里旗后口登岸——土人呼为打狗口；奉钦差大臣今两江总督沈公葆楨檄，营于凤山西郊。距凤百八十里之龟仔角、百二十里之琅■〈王乔〉、九十里之风港、六十里之刺桐脚，咸有倭兵分布；以攻生番为名，隐怀觊觎。沈公先命福靖营王游击开俊营枋寮，以遏刺桐脚之倭；相去才二十里。倭势张甚，往来游奕；我军至，始有忌惮，迹渐敛。沈公谓不可不示以威，命我军筑营垒、起炮台；飞章入告，以纾朝廷南顾忧。八月初旬，二队继至，则铭军三军暨本部亲兵副营、右军前营也；遂拨右前营驻东港为枋寮声援，余仍驻西郊。九月中，三队右军正、左、右、后四营至，则军于东郊：如火如荼，号称十万。后拨右、后营驻东港，以助前营。倭人见我军步伐止齐、刁斗严肃，其中已馁；然犹外露倔强之态。嗣度终不能支，乃俯首帖耳而去；以十一月初二日，倭船起碇。濒行，诱番民以利；致蚩蚩之氓，有拆毁倭营与士卒交哄之事：倭诚谄矣。又拔右军两营由东港镇琅桥，土客、生熟番民乃获相安。部署麤定，而旗口炮台之役兴。盖沈公以我军营垒坚壮、版筑速成，故有此命。于是凿石通径，畚土他山；经营之余，不废训练。

光绪初元正月穀日，福靖营王游击以内山生番屡伺隙戕害我勇丁，因兴问罪之师，由刺桐脚、南势湖分道而进。入山既深，孤军无援，竟为狮头社生番所败；游击死之，与难者百余人。王故守台健将，唐军门痛其为国捐躯，请于沈公决进止，先檄右军三营进营于枋寮刺桐脚。二十九日，沈公下剿番社之令。二月初三日，军门亲率候补知府田勤生由凤山东征，留候补知县宋文波驻凤山司馈饷。初四日，过东港，分营于枋寮南势湖，军们则驻刺桐脚；层峦迭嶂、丛林深箐，参天蔽日，蒙密翳翳，中无一线之路。生番出没其间，猎兽而食，饮血茹毛，穴居野处，与狐兔麋为伍。其色若土，绝非人类；而穿岩攀树，矫捷无异猿猱。持鸟枪伏要隘，以杀人为雄；人死则取髑髅络而祭之，类虎之驱伥也。彼所恃者，险阻不通；数百年来人迹罕到，任其榛榛狉狉，与琼之五指山生黎等。军门曰：『不去所恃，彼乌知畏哉』！爰檄枋寮司周有基募土勇五百人——号为「有」字营，随刺桐脚一军；枋寮汛郭占鳌募土勇五百人——为「鳌」字营，随王德成、周志本所统一军：仍由南势湖分道而进。我军列阵于前，土勇运斤于后；拓地为营，作连环犄角之势。日奔驰于羊肠鸟道之中，攻下草山、竹坑、本武三社——皆羽翼狮头内、外两社，戕害官兵，且与我相抗者也。甫逾月，两路各五营峙糗粮为深入计；东路则自刺桐脚直薄内狮头社，西路则自南势湖直薄外狮头社。番酋冥顽不灵，尚敢胁众负隅，昼出以拒我，夜伏以扰我。彼也栖洞壑若飞鸟，以逸待劳；我也摩顶踵似修蛇，有进无退。相持既久，悍番转而生智，仿我营垒，添置五卡，高筑望台，暗施陷阱，昏旦固守复十余日。然狮头久稽天讨，而他社则纷纷私议乞降矣。我军出师两月以来，募坡越涧，既不胜其苦；重以瘴疠之气郁而成瘟疫之证传染甚易，驻刺桐脚之统带武毅右

军张提督光亮以四月十四日没于军，驻南势湖之统带右军王提督德成亦病革。番人闻将领死病相继，料我军不暇进攻，稍有懈怠。军门遂于十五日简劲旅、授机宜，以正兵三路捣其坚，以奇兵三路拊其背。翌日天黎明，齐集山巅，军门亲援枹督战，诸将踊跃争先，连越三卡，两社番兵死守勿去；因于对山架开花巨炮轰击之，踣望台及社。而拊背之奇兵已得险以登，前后鼓勇而入，足不旋踵，番人豕突狼奔，鸱号鼠窜；我军斩夷过半，两社皆下之。计自开山至今，我军伤亡才数十人，而两社凶番歼除殆尽。是日分兵守社，进营于助恶之中文社下，觅得王游击暨死事弁勇骸骨于内狮社山麓。军门遣弁归其元于郡城，王氏家属以礼葬之，余骨合瘞凤山东郊，立塔以志。邻社震慑兵威，洗心革面，相率匍匐军前，纳犒以求免死。军门以渠魁授首，番众当予自新；命薙发具衣冠以见，约法八章：曰薙发、曰招垦户、曰隶版图、曰纳税课、曰男丁入塾、曰杀人连坐、曰讼归有司、曰设立社总。番人谨如约，欢欣鼓舞而去。台南数百里之内氛祲顿消，喁喁然向风归化；脱非军门躬蹈虎穴、不避艰险，曷由集此大勋欤！

福建巡抚王公凯泰奉命渡台，初欲留淮军久驻办理抚番事宜；寻以王提督复于五月十五日病没，而李提督常孚、胡总兵国恒、田太守相继不起，从征将士及营勇死于疫者又千余人。因疏请于朝，我军凯旋内渡；复分三队于六、七月之间先后航海北归，驻军邗上。是役也，两宫皇太后暨我皇上奖其劳，因有直隶正定镇总兵之命；不旬日，又有福建陆路提督之命。合肥相国以东南防务未毕，奏留军门仍统淮军。

浚颐与军门同乡里，夙钦其谦退不伐，有大树将军风度；故时相过从，肺腑论交。日者以「征番事略」见示，因撮举大略如左，俾后之人知相国之善于选将、军门之勇于治兵，以视王文成之平大藤峡，一则境内讨贼、一则海上立功，殆有过之无不及也。呜呼！淮军足传千古已。

台湾地势番情纪略方浚颐

台湾，南北径二千五百里，东西或五百里、或二百里不等；其形椭似鱼、连山若脊。以天象衡之，界赤道迤北；八卦，则位于巽。四时皆春，无大寒燠。冬日南陆距台近，故不寒；夏日北陆距台远，故不燠：民冬、夏无异衣。土著者寥寥，潮、嘉、漳、泉客民居之甚伙。人鲜白发，亦鲜髭须。女则妍丽，以双钁绾于足；巽为长女，理或然欤！风俗游惰。田则膏腴，宜五谷；一岁三熟。无霜、无冰雪，多飓台；以地震卜丰稔。所产地瓜、甘蔗、落花生之属，一种可获数秋。此华彼实，终岁累累，实硕且甘。草本与木相肖，弗枯弗凋；奇葩异卉，不可名状。山罕猛兽，猿、羊、獐、鹿千百为群。其地山川半之，未垦之田三、已成阡陌者十之二。人迹不到之区，阴霾蔚荟，瘴厉尤烈；中土之民，望而裹足，招徕匪易。煤、铁、金、银，富哉厥矿；近则台北鸡笼已伐山取石炭矣。海涌有定期，每岁以四月二十六日为始，奔腾澎湃，乾坤震荡，至霜降乃平；谣曰「涌门开闭」，洵乎不爽。鹿耳门为至险，其次则旗后口。初仅一小港，道光间，一夕风涛冲刷，口门忽宽；两崖夹峙

，中梗块垒，象人之喉；旁皆暗礁，番舶不能出入：其殆天之所以限华夷耶！惟鸡笼山阴有钓鱼屿者，舟可泊；是宜设防。琅桥，云有火山。凡山之西平壤，独隘山内暨山之东则尽生番；志分为三，中曰秀姑峦、北曰岐莱、南曰卑南觅。番之种类不一，有耳贯大环者、有臂刺花纹者、有雕题髡面者。男则束布于腰，曰「水幔」；女则衣短袖衫、着裤，发盘而不结，以山果穿丝为饰。土人曰求抚女故衣，曩亦如男之裸也。穴洞而居，死则就洞中坎地■〈广〉〈𠂔上土下〉之。甃石，而生者寝处其上；虽子于父母亦然。男女婚配，不假媒妁。女与男遇，相和而歌；如其意，则女随男去。

生子，伯从父姓；仲与叔以所居为姓：东则姓东、西则姓西。「王」字番至尊，诸番莫敢伍。男女皆魁梧，喜文采；女以五色纓络覆额。腰弓手刃，嗜杀同诸番。番目有大头人、二头人、三头人之分；能杀人者，大头人赏之以番女。杀人多则妇多，众皆随之；杀至十人，则推为酋长。水沙连谷地近彰化，潘伟如方伯曾至其地。云山水灵奇、人物秀美，清风徐来，芬馨四溢；时则白菡萏盛开，花瓣一痕金线如画，俨入桃源。又有玉山，遥睇之，晶莹滢漾；悬崖峭壁，人不能上。野史云：往者，有路可通。郑克塽欲采玉为玺，率众百余入山求玉，不得；三日，死于瘴者过半，迷路不得出。祷于天曰：『郑氏不绝，则请赐玉，得出山；否则，愿与从者同死』。祷毕，旋得玉。一叟突至前，诃之曰：『仙山毋久留』！导引出山。回顾，则轰若雷琅，平地陷为深壑：土人能言之。

唐军门统淮军驻南路山西，与牡丹十八社相近之琅桥、内狮头等社相近之刺桐脚、外狮头等社相近之南势湖、率芒等社相近之枋寮，皆卑南觅山之阴。刺桐脚一路，先下竹坑社，次下本武社；南势湖一路，先下草山社；内、外狮头两社，则于乙亥四月十六日刺桐、南势两路夹击下之。内狮头易名内永化社、外狮头易名外永化社、草山易名永平社、竹坑易名永安社、本武易名永富社，均闻于朝。其因剿乞抚者十八社，曰中文、曰大龟纹、曰外龟纹、曰内龟纹、曰加至来、曰阿栽米息、曰妈梨也、曰加鲁鲁望、曰大甘仔密、曰周武滥、曰干仔律、曰大笼藕、曰吧妈二、曰射不力、曰阿养益、曰风水岭、曰鲫鲤潭。其闻风乞抚者率芒等社，曰率芒大社、曰南董的、曰北力力、曰射麻哩、曰平埔、曰麻哩吧、曰新也烟、曰谢阿阁、曰龟仔笼藕、曰妈仔后、曰南片、曰金仔势、曰武黎益、曰崩武。又牡丹十八社暨三五社结伴来降者，不可胜纪。卑南觅内山诸番，凶恶嗜杀，甲于他社；日者皆隶版图，直达乎卑南觅山以外矣。台湾镇张军门其光则开中路，为秀姑峦之山阴；闻风就抚者，曰集一铺、曰林圯埔、曰社寮、曰大坪顶、曰大水窟、曰顶城、曰大坵田、曰扒不坑、曰茅埔、曰南仔脚、曰蔓东埔、曰内埔、曰大猫狸、曰昆仑坳、曰诸也葛、曰老鸦石、曰七家蟹、曰陈阿修、曰大石岩、曰仑顶，亦皆于四月望后投诚者。续抚各社尚多，忘其名。又水沙连就抚者三十九社，公牒无名；盖亦达乎秀姑峦以外矣。福建陆路提督罗军门大春开北路，为岐莱山之阴；闻风就抚者，曰大南澳、曰大鲁阁、曰符吻、曰豆囍、曰苏澳、曰斗武达、曰斗史麻达简、曰斗史实纪律、曰斗史么哥、曰老辉、曰加礼宛、曰南势、曰得其黎、曰九宛、曰实仔眼、曰龟

■〈口女〉、曰■〈口女〉沙、曰实仔八眼、曰竹仔林、曰武■〈日要〉、曰七结仔、曰谈仔秉、曰瑶歌、曰根老邪、曰饱干、曰薄薄、曰斗难、曰七脚川、曰理刘、曰脂魁魁、曰木瓜番、曰大吧笼藕、曰吗哒唵，皆与南、中两路同时来归——尚有不知名者；盖亦达乎岐莱山以外矣。秀姑峦、岐莱生番化为熟番者十之六，大社千人有奇、中社数百人、小社百余人。

方浚颐曰：天戈所指，群丑震惊；大启屯蒙，普施覆帔；神武不杀，肤功是奏。狼獾弭伏，鲸鳄远徙；海战于陆，勇济以仁。观其名目，怪怪奇奇；书之简编，毋乃庞杂。聊用纪实，忘其不文；军门曰善，足为信史。

附录三

征番纪勋

征番纪勋依田学海

明治五年七月二十八日，鹿儿岛县参事大上纲良上言：『琉球自古为我臣属，朝聘惟谨。厥邦远在南海，声教未遍；近者遣使谕以恩威，国王、民人等恭体圣旨，日向德化。顷有国人属宫古岛者，以去岁冬漂到台湾六十人，多为番凶所虐杀，生还者十二人；番凶残暴，罪在必诛，岂容宽恕！伏愿借臣纲良以兵舰数只，凭仗天威，殄灭暴虏，耀武于海外、雪冤于属邦，不堪恳款』。先是四年十月，宫古八重山二船发琉球那霸港；十一月，遇颶于南洋相失。越六日，漂到台湾，弃船上陆。遇一辨发者，问路径；其人指曰：『公等宜南往，不宜西去，大耳人斩汝头矣』！六十六人者皆大惧，乃请其人为导；南行数里天暮，导者指石窟曰：『公等宿此，待明而行』。窟狭不可容，乃辞，导者怒而去；皆曰渠言难信，遂转西行。明日，见茅舍于南方；至则大耳人也，炊芋饭客，尽褫其所带物。夜半，有人排户入，状貌狰狞；手执刃三尺许，喝曰：『脱衣』！尽褫去。天明，又有五、六人，猛如虎狼，并执火枪；曰：『莫去！且待吾猎归，将飧公等也』。皆恐惧股栗，争逃去。番人追之急，六十六人走入一舍，请哀。有老翁——七十余及其子，问姓名；乃执笔将下，忽追者至，执刃大呼叱。六十六人皆裸，取其头簪、衣服，驰出门外；留者二十二人。俄而，有一人被发驰归，舌喘不能声，呼曰：『皆死矣！死矣』！留者仓皇出，见流血殷地，番人挥刃斩首；胆落魂飞，四散奔走。独仲本岛袋等九人匿而不出；居两日，翁有婿来曰：『公等在此危甚』！乃携至其家。有三人逃归，曰：『五十四人骈死山中矣』！婿名曰杨友旺，地曰保力庄；盖清国人也。友旺与邻人杨阿和等议，遂报之凤山县；县护送台湾府，以明年正月至福州。无几，归本国。又，八重山船遇颶后，见岛屿于海中；及近岸，俄有番人群聚，状颇恶。会凤山县人李成忠来，曰：『渠为生番，凶暴无比。公等速去，莫遭毒手』！皆大惧，急

请偕；搭载至打狗港，达台湾府。其上岸者二人，殆为所杀；有清国人郭潜、尤魁者救之，得以脱走达府，遂归本国。至是，事闻，朝议以为台湾地属清国，难遽动兵，宜先发使问之。

六年二月，以副岛种臣为总理外务大臣，发遣清国；诏曰：『朕闻台湾生番数残害我民，释而不问，后患曷极！今委尔种臣以使命之重，其往伸雪之，以副朕保爱斯民意』。乃敕「龙骧」、「筑波」两军舰送之。种臣进入北京，见其亲王大臣等，先议通好盟约。成例：应谒清主。清人欲我使臣循其俗，行三跪九叩礼；种臣不肯，曰：『国俗不同，礼数各异。我不能用贵国礼，犹贵国不能循我国俗也』！清人不能屈，从之。于是，种臣与大臣议欲惩治生番以遏后患；清人乃言：『琉球我藩属，被害与否，何烦贵国』！因论琉球非日本部属，不复及生番事。种臣乃使外务大丞柳原前光谓：『不复多言，且问贵国能辖生番否』？清人答曰：『是化外民耳』。前光曰：『番人残暴，毒害我民，天地不容，理当惩罚。若贵国置而不治，吾邦欲特派一军治之，庶莫退而有后言』！种臣还奏曰：『台湾，可伐也』。朝议久而不决。十一月，发遣「春日」舰以察其动静。

是岁一月，我备中国柏崎民利八等四人亦漂到台湾，为番人所虏，具极困辱；半岁余，得脱还。当是时，我海陆军将士多萨人，以琉球旧为其属部，怒甚，屡请兴师。七年四月，朝议遂决，以陆军中将西乡从道为台湾蛮地事务总督，以陆军少将谷干城、海军少将赤松则良并为参军，率「日进」、「孟春」、「大有」等兵舰至长崎，征壮兵、储粮食，刻日将发。俄而朝议欲缓期，将士愤怒，势不可止。从道乃决意进讨，命陆军少佐福島九成驾「有功」舰先发至清国厦门，投书其兵部尚书、闽浙总督李鹤年曰：『台湾土番，自古嗜杀行劫，不奉贵国政教。近年我国人民遭风漂到彼地，多被残害；幸逃脱者经贵国救护，送回本土，感谢奚似！独怪土番幸人之灾，肆厥劫杀；若置不问，安所底止！是以我皇上委某以重任，深入番地，谕彼酋长，殛其凶首，薄示惩戒，以安良民。今将由水路直进番地，若船过贵国，固无他意，应毋拒绝。但虑内外商民在彼口岸窃与生番互通交易，资助军需；岂得不备兵缉捕！望贵国遍行晓谕：沿边口岸中外商民勿得毫犯。又恳请倘有生番走入台湾府、县潜匿者，烦贵地方捕交我，是望』。乃去。直至台湾，建营琅■〈王乔〉；使米国人哥塞儿传译熟番：『我兵来此，欲问罪生番，非害汝等』。盖台地番人有生、熟之称：其熟番驯服清国，岁时纳贡；生番跳梁山谷，出没不测，残害良民。所谓牡丹社者，其一也。居三月，参军谷干城、赤松则良率兵至，筑垒设帐，严守备、置斥堠，以防夜袭；搬辎重，以图久屯。复使哥塞儿进入南部探动静；哥塞儿还报：『南部熟番酋长等畏我兵，不敢出；不若诸公自往，说以利害，不与生番合，是我利也』。干城乃与则良议；明日，则良从数骑以哥塞儿为导，至纲砂，见小麻里酋长伊查，使译言：『参军笃信伊查，欲结友谊，固非欲战者。闻清国人流言，我兵欲歼大耳人，误矣！伊查若为不信，请留我为质，身抵日本军问之。吾欲问罪者，牡丹社耳。且闻伊查立约专救遭难人民，仁慈可嘉！若欲得「避兵符」，参军必喜授之。吾又将测量海路，建浮标以避暗礁。汝宜谕部下，悉知此意。吾与

伊查相见，殆同熟识；请共饮一杯酒』！伊查大喜，手加额曰：『大日本大爷，好人也！谨如其约』。五月十八日，大雨；溪水暴涨，几没营。乃移阵龟山，发斥堠视虏地；至四重溪，有生番发铙于深莽中，杀伍长北川直征，伤卒一人。我兵怒甚；明日，遣兵士十余人以熟番为导，贼二十余人葦林发铙，我兵击毙其一，皆骇走；众欲尾击之，熟番曰：『虏狡，或有伏』！乃止。诸将议曰：『生番寇我，情理难容；且恐熟番阳服阴叛，宜势禁而威服之』。乃贴示熟番曰：『日本人难分生、熟，若有携带兵器帮助凶恶及与生番交利器者，悉照军律处治。即生番人改悔来降，我不敢行杀；又斩凶恶来营，厚行重赏』。二十二日，分二百余人分为三，自竹社、风口、石门进。石门距龟山三里，巉岩削立，势如剑戟；贼据险为壁，弹丸雨注，我兵大阻。乃分兵绕出其背，俯瞰贼垒，乱射之；贼骇走。我兵挥刀逼之，斩三十余人，流血被道；熟番视其二尸，鞭之曰：『尔跋扈虐人，今果何如』！盖牡丹社酋长阿禄父子也。

先是，从道率兵士三千五百人，驾「高尾」舰发长崎；是日，至琅■〈王乔〉，军威大振。事闻清国，李鹤年向得书，未信；至是，大惊，乃使其僚属来致书曰：『台湾久隶我版图，已二百年。其土番有生、熟之别，犹粤、楚、云、贵边界猺獞苗黎，獠狃成性，文教未通；然居我疆土，属我管理。按万国公法云：凡疆内动植物、居民，皆当归地方管理。又云：各国自主其事，自任其责。台湾以我律法管辖，不得听贵国越俎代谋：请速收兵，莫以后二国之衅』。从道延见使者，曰：『从道奉圣诏以荡灭番贼；非有诏，寸步难移。若本岛属贵邦与否，非戎臣所知也。请问诸我公使在北京者』！使者莫以难，扬帆去。

六月一日，从道与参军等议，欲大举讨牡丹、高士猾诸番；分军三道并进，向四重溪。时霖雨始霁，日光如毁；一水横前，奔流疾箭。诸军提挈乱流而渡，有溺死者。已深入山谷，榛莽塞径，泥淖没踝。贼伐木隘路，出没放铙；我兵呐喊而前，射杀数十人。贼涉险奔逸，矫捷如飞，我兵不可追获；遂进，火其庐舍。二路军亦如之。三日，会于牡丹社；贼遁匿山谷，不复见一人。从道与诸将胥议：『贼惯险阻，出没难测。我怒击之，则禽奔兽遁；欲殄歼之，则功劳不偿。为今之计者，莫若断饕道、塞走路；彼情见形屈，必悔非乞哀』！众皆曰：『如都督言』。乃要戍要冲，严修守备；还军龟山，建兵营、缮道路、储粮仗、造病院，为持久计。因使统领埔头人林阿九、九猴洞头人陈阿三等深入番地，探贼情；贼迎问，知我兵恩威并行，秋毫无犯，喜惧交集，乃就请降。

七月一日，牡丹社新酋长姑柳、高士猾酋长符也冷烟、周勝束朱雷土结及尔乃、蚊蟀、傀仔角、小麻里诸酋统下生番七十余人皆顿首来降。从道乃使参谋作间召牡丹社姑柳，膝行而进，面如土；作间徐问其意，姑柳曰：『奴等素与清国为仇，向不知琉客为大国属，误为清人，杀之。不测冒犯天威，以蒙斧钺。自今以后，悔过移善；投降麾下，永为隶属。若遭难民漂到本岛，厚给衣粮，备加救护。伏愿将军大爷宥无知番民，以许自新』。作间乃诘责：『五月十八日，我兵至四重溪，尔番民

敢纵凶虐！是何故』？姑柳谢曰：『前酋长阿禄闻大国兴师剿灭我社，欲出辨疏；遽为大兵所击，不得已拒之，非敢抗王师也。石门之战，阿禄父子死矣。奴为众所推，代之。闻将军罚有罪，不及无辜；敢来投降，岂有他意』！作间复问：『六月一日，我师复至四重溪，尔等犹抗之，果何故』？姑柳战栗曰：『是阿禄所为；奴猎山中，不与知也。阿禄凶悍无道，为王师屠戮，天也』！作间又召高士猾、尔乃两酋让之，皆顿首乞哀如姑柳言。乃谕以恩威，释之；酋长等欢呼拜舞去。于是生、熟两番皆降，都督之威振远迩矣。

台湾彰化县人廖仕强上书都督曰：『清官贪虐，诛求无已。加以客岁用谗言，谓臣侄有富窝藏贼匪，举兵袭击。今年三月，复侵我；事逼危急，会日本二大人辱临，慰藉甚殷。不幸清兵猖獗，烧毁有富家，并收夺二十余乡熟禾。臣等痛愤切骨，誓欲报仇。近闻都督率兵南伐，天赐机会；伏望爱怜，臣等首尾相应，以除贪官污吏，以活我小民』。所谓二大人者，我海军士桦山资纪、水野遵也。先是，征番师未发，使二子探侦番情往。至彰化县廖有富家，有富大喜，飧待甚恭；欲推二子为将，拒清兵。二子谕以『我与清同盟，不得相仇』；乃辞去。至是，从道亦斥其书，不纳。

既而清国讹言日本欲取台湾，清廷大惊；使福建巡抚沈葆楨驾火船率兵数千至琅■〈王乔〉港，见从道曰：『贵国出师，盍豫告我！敝邦将以赋从之；诛暴弭乱，不敢让人。今提兵莅疆，贵国业已奏功，不使我及事，可恨也』！从道曰：『客岁我使臣报之贵国文，案具在此』。葆楨知不可屈，乃曰：『如闻遗种潜匿山谷，仆将出偏师为诛锄之』。从道不肯，曰：『戎事，吾职也。蠢尔小番，何烦大援』！葆楨又请申明约束，纳质表信。从道正色曰：『大邦之信，难恃也。向者答我使臣曰：「生番化外民」；今以为所辖，其亡信者一。敝邦之师，先告后发；今日不知，其亡信者二。我民遭害，既经二年；今乃借口讨伐，其亡信者三。大邦约束，我知其不可保矣』。葆楨退曰：『日本人崛强乃尔』！遂去。

八月，周勝束大酋长抵我都督，请曰：『奴等既为大日本国人民，瞻望都督风采，欲一请旌节辱临穹庐』！从道许之。番俗无舆马，代以祭神轿子，番奴十余人舁之；行山谷间数里，至小麻里社，酋长伊厝迎飧之。飧毕，进入周勝束社；是为南部生番十八社，大酋长盛服伺候门外，拜跪甚恭。从道一揖而登，番奴数十人捧烟草、槟榔摆排桌上，次供火酒、腌豕。酒系薯制，冽而不甘；豕则饲以番薯肉，咸而臭甚。酋长与其部下刳豕，饮酒立尽数石；我将士亦醉饱，然饮量不及，乃笑曰：『武则赢，酒则输』！酋长唱番歌一曲，曰：『祝都督也。请和之』！兵士跳跃而歌，番人大喜。时山间月出，光照筵席，番人起舞；从道笑曰：『昨为仇敌，今则一家』！亦起舞。既而曰：『予醉矣』！因倚床睡，鼾声如雷；番人骇服。明日归营，命水野遵等与医师巡视番境，抚循小民。见其患病者，为施药，立愈；番人惊以为神，遇遵等甚厚，曰：『吾辈永为大日本民矣』！

先是，朝廷闻清国有违言，乃以内务卿大久保利通为办理大臣，委以重事。九月一日，达天津。清人以为我兵至，骤严守备；已知为使者，发人迎之。十日，入北京，见军机大臣和硕恭亲王、大学士文祥等于总理各国衙门，首论番地事；文祥等枝梧抵赖，久而不决。至十月，利通谓文祥曰：『往复论辨尽矣，仆不复与公等言；我当从吾意耳』！拂衣而起。于是物议沸腾，变且不测。英国公使威达闻之，为居间和解；遂立约三条，纳修道建房费银五十万两于我。十一月，利通驾兵舰驰至台湾，见从道，告和成；天皇特命东久世通禧敕从道班师。于是从道召车城头人林德胜、董成明、田中央头人林明国等，赐酒食，谕以与清国和；且曰：『汝人民等自今以降，视清国官吏犹视我官吏，谨奉其政教』。又召牡丹、周勝束酋长土结文脚、蚊蟀酋长加礼带及诸社酋长，赐酒与衣物；谕曰：『从道奉命来此，汝番民悔过迁善，稽颡归诚；从道奉戴圣旨，皆释其罪，欲使汝辈长浴皇泽。顷者清人讲和，彻师有日；汝辈安堵如故，亦圣恩也』。番民等感激泪下，顿首谢恩。初，王师之入番境也，有番女年可十二，为军士所获；以军中不可置女子，送之东京，教以「国字」、导以礼容。居数月，稍解邦语，颇革番俗。至是，还付之，番民大喜；其父兄额手曰：『恨吾辈不为俘虏，以浴大朝之化矣』！

既而清国使其官吏率兵至台湾，从道乃簿录所有营造屋庐及修治道路交付之。又修琉球人墓于统领埔，祭之；书其表，略曰：『明治四年，我琉球藩民遇颶漂到台湾番境，为牡丹番所杀者五十四人。藩王以闻，天皇震怒，敕臣从道问其罪。今兹四月，候骑先发，诸军嗣之；番人箠壶相迎，独牡丹、高士猾等不下。五月，击之于石门，毙渠阿禄父子以下三十余人。六月，我兵三道并进，屠其巢窟。九月，牡丹、高士猾等余党请罪辕门，事平。初，琉人遭害，广东流氓邓天保拾收遗骸，葬之双溪口——后移统领埔。兹重修旧坟以表之』。十二月，振旅而归。

是役也，自夏涉冬，瘴气发疫。全军四千五百余人，其死于战者，十二人；死于病者，五百五十余人。天皇赏其功而悯其死，敕葬之肥前彼杵郡小岛乡梅崎，命史官建碑，录其颠末。

百川曰：征番役，吾友人水野遵从焉。所著有「征番日记」，文字质实，记载极备。世多记是役者，然动失夸张，不得其实；余乃据「日记」并征遵言，录其大略。遵字大路，爱知县人。好学，通西洋文字，兼善诗。今为参事院议官补，叙正七位。

。

后记

这本原名为「罗景山台湾海防并开山日记」在庞百腾先生于香港大学冯平山图书馆发见时，不着撰人，祇是在书名上冠以「罗景山」三字。景山为罗大春字，今既着撰人名氏，因删「罗景山」三字，径题作「台湾海防并开山日记」。

关于罗着「日记」在台湾史料上的价值，庞先生的「弁言」已详晰言之。至其未臻「十全十美」之处，「弁言」亦尝指出：『其所谓「日记」，亦与现代之日记有所分别。在原文内，他往往将一两个月之事情一起谈论，以至造成时间性之混乱。数处记载，又缺日期』。同时，当我们整理发稿时，又发见错字、衍字及舛误之文，多达二百余处。凡此，除若干「系月」缺略已予考补（用括号标明）及有不甚明确者于「日期」下另加问号（？）存疑外，其大部分并分据「筹办夷务始末」及「沈文肃公政书」（以上二书，「文丛」辑有第二〇三种「筹办夷务始末选辑」、第三八种「同治甲戌日兵侵台始末」及第二九种「福建台湾奏折」等三书）等史料加以校勘，分别订正。其中衍字径删、错字径改，所补各字则加〔〕表示之（其余无法订正者仍之）。

由于罗着「日记」字数不多，因另搜补一些相关资料，作为「附录」。按清季台湾的积极筹防，肇始于同治十三年日兵入侵牡丹社；所谓「开山抚番」乃为筹防所作开发并经理东部台湾（当时称为「后山」）的具体措施。所补资料，即与此有关。

其一为不着撰人撰「上制府请经理台湾后山番地」禀。中央研究院历史语言研究所傅斯年图书馆藏有善本书「稗海余闻」一种，手抄本。封面左上方题「稗海余闻」，右下方署「鸿雪轩钞」四字（并钤有「鸿雪轩」朱印）。内文五篇：一为「上制府请经理台湾后山番地」，二为「吴中人士致英领事威妥玛书」（首称「义民师周孔致书领事威先生阁下」），三为「原洋患」（师周孔作），四为「书师周孔稿后」（文末附缀的「识语」，尾署「丁卯季冬澄怀书屋自识」），五为「原洋患」（末识：『向为友人掇力，条陈洋务，颇蒙大府采择。今节其起结，别为「原洋患」一篇。东施效颦，自忘其丑矣。澄怀书屋自识』）。其与台湾直接有关者惟首篇一文，因迻作本书「附录」之一。本文作者似为一在闽「另候任用」之闲员，于同治六年（丁卯）四月间建议闽浙总督吴棠经理东部台湾（阅文首「敬再禀者」语，知所建议者不止一事）。其中所云『此时台湾后山海道中国商船所不至者，洋船已成熟路；生番悍而无知，遇有停船取水，难保不无劫杀』——这无异为后来日兵入侵牡丹社所借口的预言。又云：『若以「不隶版图」之说直覆洋人，彼将举兵攻击』；更不幸而竟言中。文末他人所附按语所云「数年之后，台事棘手可知」，事后回顾，真不啻先事预见。同治六年下距十年十一月及十二年二月琉球人与日人先后飘风遭难暨十三年日兵入侵相隔四至七年，由于当局昏聩，无所展布，终招致日人的覬觐；亡羊补牢，惜时已晚。

其二为方浚颐撰「淮军平定台湾番社纪略」与「台湾地势番情纪略」两文。作者安徽定远人，著有「二知轩文存」；上述两文，即就其中选录。所纪光绪元年淮军唐定奎「平定台湾番社」，乃指南路一部分「番社」而言；而北路、中路由罗大春、张其光等「开山抚番」事，并又于「番情纪略」中及之。由于作者与唐定奎同里，时相过从；因唐氏示以「征番事略」，乃撮举其大略云云，洵可直媲接史料。今收作本书「附录」之二，俾供互相参证。

其三为依田学海撰「征番纪勋」。作者字百川，日人。日兵入侵牡丹社，随军日人水野遵着有「征番日记」；此文即据以撰成。原文刊「谭海」卷四，并有杉山三郊、依田耕雨的合评。「谭海」未见，台湾省立台北图书馆藏有此文抄本，据以录出。今略去评语，只存本文，收作本书「附录」之三。所记虽属彼邦人语，亦有足供查考之处。如罗着「日记」所称同治十三年三月六日之夜「奸民」廖有富率其党倾巢遁入内山，据此文得知有富与日人桦山资纪、水野遵原有一段过往渊源，当时竟投日本军营以去。这只是一个显例，他不具举。

当同、光之交有关日兵侵台及「开山抚番」的文献，除已刊「文丛」诸书以外，尚知有南路海防同知袁闻柝（警斋）撰「日本窥台始末」一卷及「开山日记」四卷，惜未之见。又「文丛」第二二七种「台案汇录壬集」卷二、卷三据台湾省立台北图书馆抄本「台湾奏稿」及「台湾中路开山抚番案稿」所辑部分，亦属本书相关史料；因易为书题所掩盖，特为指出，以供检阅与参考。（吴幅员）

本书正文及附录索引

二画丁日昌（雨生）三八丁汝霖一九丁嘉炜（韞石）一八七里溪四四七家蟹社三四、七五七脚川社四七、五三、七五七结仔社四七、七五九江坑三二九宛社四七、七五九猴洞八二八里埕五六、五七八重山七七、七八

三画三家厝二二三栈城三三、三七、四三、四四、四七、四九、五〇三貂岭五六三鯤身二九上元庄一九上海（沪）五、一二、一六、一八、二四、三〇、四〇上海总税务司（见沪海关）下加冬一四下射寮港一七下淡水一九、二三下楼社二七干仔帛社一八干仔律社七四土人一九、二二、二三、七〇土目二二土勇一五、一八、二一、二七、七〇土番七九、八一土结（番目）五三、八二土结文脚（番目）八五土围五四土煤（见煤）土豪三二大上纲良七七大久保利通二五、二九、三〇、八四、八五大屯山五七大巴笼（见大吧笼社）大水坑五八大水窟四八大水窟社七五大甘仔力社五二大甘仔密社七四大甲一四、二一、五六大甲溪五七大石公岭三一、三二大石碇三七大石岩三五大石岩社七五大安五六「大有」（轮船）七九大耳人八〇大吧笼社四八、五四大吧笼藕社七五大坑埔五八大坪林四三、四四、四八、四九大坪顶四三大坪顶社七五大坵田四八大坵田社七五大南澳一六、一九、二〇、二七、二八、三一、三二、三三、三四、三七、四二、四四、四七、七五大南澳社七五大科围一九大埔角一二大清水二八、三一、三二、三四、四二、四三、四七大鸟万社一八大猫狸社三五、七五「大雅」（轮船）二四、二六大铜炮二九大鲁阁三一、三二、四三、四七、四八、七五大浊水二七、二八、三〇、三一、三二、三三、三四、四二、四七、五四大泽正衡五大树坪四四大龟纹溪五一大桥头五一大藤峡七二大铁炮一八大笼藕社五五、七四子药四、一〇、一三、一七、三三、四八（参见火药三二、三六、四七、六三、洋火药）小南澳一六、三三、三六小清水四七、四九小岛乡八六小麻里社（小麻哩社）八二、八四山猪毛社一九川石三九川崎祐（副都督）二五工匠一九、二〇、二一

四画中心仑社四六、五一、五五中纹社五三、五五、七一、七四中国三、四、八、一三、一四、一六、一七、二二、三〇、四〇、六〇、六六、六七、六八（参见清）中路一四、二〇、二四、二七、二九、四八、五八、五九、七五中枋五七五里亭一九、二〇、二六、五虎口一五虎门五七五指山七〇五块厝一九元（朝）八「元恺」（轮船）三六内山二、二六、三一、三五、四九、五五、六五、七〇、七三、七五内埔二六、三四、五四内埔社七五化番四一、四三、四九天津一、八五天皇（日本）八五、八六尤魁七八文祥三七、八五文煜四、六、八、一一文炜三九斗史四一、四二斗史社一五、四七斗史麻达简社四一、七五（参见麻达简社）斗史么哥社七五斗史实纪律社四二、七五（参见实纪律社）斗武达社七五斗难社四七、七五方浚颐六九、七二、七五日本三、四、五、七、八、九、一〇、一一、一二、一三、一六、二七、三八、四〇、七八、七九、八〇、八一、八三、八四（参见倭、倭奴）日耳曼二四、三五「日进」（兵舰）七九日意格（Prosper Giquel）

五、一一、一二、一三、一六、一八、二四、二五、三五、五〇木瓜社四七、五四、七五木栅五四水沙连二四、二九、五八、六五、六七、七四、七五水野遵七、二二、八三、八四、八六水雷四、五、九、一〇水里（社）四八水幔七三水炮台三八火箭五火龙五火药二二、二八、二九、五〇（参见子药、洋火药）牙等（番目）二五牛轡轡五四王（提督）七二王文成七二王玉山二七、二八、四三、四四、四五、五〇、五三王正道（副将）五「王」字番一七、二一、七四王得凯二七、二八、三二王凯泰（补帆）四、五三、五五、六一、七二王进良三二王开俊（游击）二、一七、一九、二二、二三、三五、四〇、六九、七〇、七一王维新三六王德成四五、五一、五二、五八、七〇、七一王荫南五五王福禄四五、五五王鹤康三九

五画出使五五加至来社（见加芝来社）加芝来社五、一二、七四加鲁鲁望社七四加锥来社（见加芝来社）加礼宛二六、四七、四九、五四、七五加礼带（番目）八五回疆八北力力社五五、七五北川直征八〇北京一三、一八、二四、二五、三九、七八、八一、八五北洋三九、五五、五九北洋大臣六、一〇、一八、五五北港仔五四北路六、一三、一六、一七、二四、三六、三八、四六、四八、五八、五九、六一、六二、七五卯鼻三七古春荣三七四重溪五、八〇、八一、八二、八三四脚亭五八外人六〇外交四外国六二、六六布六七平埔二二、四一、四七、四八平埔社七五平壶岛八平溪四八打狗六九、七八打鼓山一九扒不坑四八扒不坑社七五本武社五一、五三、七一、七四幼师（见沈葆楨）正定镇七二民（汉人、汉民）二、六、一三、一八、二一、二二、二三、二五、二六、二七、二八、三三、三九、四〇、四一、四三、四四、四七、五三、五六、五七、五八、五九、六二、六三、六五、六六、六七、七三、八四民团二三永化社五三、五五、七四永平社五三、七四永安社五三、七四「永保」（轮船）二四永福社（永富社）五三、七四永乐八瓜州一八生番二、三、四、五、六、七、八、一〇、一二、一五、一六、一七、二〇、二二、二七、二九、三〇、三二、三三、三七、三八、四〇、四四、四八、四九、六〇、六二、六三、六五、六六、六七、六八、六九、七〇、七三、七五、七八、七九、八〇、八一、八二、八三、八四田大兴二七田中央八五田晋阶三六田勤生三五、五一、五二、五三、七〇、七二田德瀛三六白牛（番人）三四白沙一八白竿塘一、二石空仔四九石门五、一二、八一、八二、八六石门岭三二石屋二八石碇三七石壁三六石桥五四石关四九

六画「伏波」（轮船）一、六、一一、二四仲本岛袋七八仰光三六伊查（番目）八〇伊厝（番目）八四凶番一九、二〇、二六、二八、三四、三五、三六、三七、四四、四五、四六、五一、五二、五四、七一、七七光绪四二、七〇同治一、八、九、三九印度六〇成广澳四八成富清风一七合水五四吉利用通二五■〈口女〉沙社四七、七五安平一二、一三、二五、二六、二九、六一、六二安南六〇安抚军三〇安徽六一「安澜」（轮船）一、六、一一、二四、二六奸民二四、四五朱仁彪三七朱成功（见郑成功）朱明登四五、五五朱干隆三五朱雷社八二朱荣彪二八朱凤仪四一、四二「有功」（舰）七九「有」字营七〇江（见长江）江北六一江西四五、六五

、六六江南三、六一江苏（吴）四、三〇池州六一竹仔社五竹仔林社四七、七五竹坑四四、四六、五一竹坑社四六、五一、五三、七一、七四竹社八一竹围二三竹塹一四、二一、五六、五七竹篙厝五八老寮坑五八老辉社七五老鸦石三四老鸦石社七五米一五、一七、一九、二〇、二三、二七、二九、三一、三二、三三、四九、六一、六五米国（见美国）米仑港三二西人四、八、六〇西河二〇西洋四、五、八、一〇、三五、三六、三九、八六西湖（浙江）六六西乡从道（陆军中将）五、七、八、一二、一六、二九、七九、八一、八二、八三、八四、八五西路一九、七一西潭底社二七西藏八百川（见依田学海）

七画何迪华五一、五二何树春二六、三三佐久间（先锋）七作间（参谋）八二、八三兵二、四、九、一〇、一一、一三、一五、二〇、二一、二二、二三、二五、三六、三八、四二、四三、四四、四六、四八、四九、五〇、五二、五三、五四、六二、六三、六九、七一卑南一八、一九、二五、二六、二九、三五、五四、五八卑南觅一八、五九、七三、七四、七五吕宋六六谷干城（陆军少将）七九、八〇妈吧二社七四宋文波七〇宋先聘五一、五二宋奎五（见宋魁五）宋魁五（奎芳）五二、六二、六三岑葆芝（方伯）三岐莱（见奇莱）吴（见江苏）吴（哨长）四三吴大廷（桐云）一七吴仲翔（提调）五吴全城四八、五四吴光亮（霁轩）一七、二五、二九、四三、四八吴奇勋一八吴维隆三六吴标南三七吴霖森五三扶圳一九扶里烟社二三束维清四六李玉贵五〇李仙得（儿李让礼）李光二六、三四李成忠七八李彤恩三七李阿隆三一、三二、三三、三七李长兴二三、五〇李东来一九、二〇、五〇李英二〇、二七、二八李振发三一李益林三九李得升一九、二七、二八李常孚三五、七二李清琳二七李胜才五五李学祥一七李鸿章一八、五五、六九、七二李鹤年（制军）二、三、四、六、七、八、九、一一、一七、三七、四一、七九、八一李让礼（Charles W LeGendre）二四沅州四一沙贝（见沙背）沙背（番目）五三沙马崎头六六沈幼丹（见沈葆楨）沈秉成（仲复）三〇沈葆楨（星使）一、三、四、五、六、八、九、一一、一三、一四、一五、一六、一八、一九、二〇、二二、二三、二五、二六、二七、二八、二九、三〇、三三、三四、三五、三七、三八、三九、四〇、四一、四四、四五、四六、四九、五〇、五二、五三、五四、五五、五六、六八、六一、六三、六九、七〇、八三、八四牡丹社三、五、一七、一八、二五、四一、七四、七五、八〇、八一、八二、八六「牧源源吾」（兵船）一二秀姑峦（秀孤鸾）七、二四、四七、四八、五七、五八、七三、七五秀涂一三赤山二五、三〇赤松则良（海军少将）五、七、七九、八〇良民七九、八〇言语三〇、五三豆兰社（豆囷社）三二、七五贝鲁爱二五车城四〇、四一、八五那霸七七阮经标五三里明东（Remington）六、一七

八画亚利目（番人）三四依田学海（百川）七七两江五四、六九两湖九刺桐脚四〇、四五、四六、五一、五五、六九、七〇、七一、七四制兵三、四、九制军（见李鹤年）取雷（番目）五三周（朝）三四周士得一五、二〇、二七周子玉（懋琦）三〇、四〇周占魁（哨长）四四、四五周有基二二、七〇周志本七〇周武濫社五二、

五三、七四周恩培（守备）三四周善初（参将）三四周维先二七、三一、三二、三三、三七、四二、四九、五二周德富一三、四二周润斋（中衡）三七周勝束社八二、八四、八五周树人三七、四一、四二、四九、五四奇莱二一、三一、三二、三三、四三、四七、五七、七三、七五姑令（番目）五三姑柳（番目）八二、八三姑益翼（番目）五三姑鳅（番目）五三「孟春」（战船）七九官军二、三一官学五五宜兰五八帛尔陀二五府城（见台湾府）彼杵郡八六拉立（番人）三四拉保德二五招抚二二、二六、三八、四八招抚局五五招垦三八拔礮社一二明（朝）四、八、三九、六〇明治七七、八五昆仑饶一九东久世通禧八五东京八五东洋三九（参见日本）东埔四三、五四东港一七、一九、四〇、六九、七〇东路七一东澳一五、一六、二一、二八、三四东岭脚一九林上达三九林乞食（番目）二六林阿九八二林明国八五林圯埔社四三、七五林廷瀚三九林桂芬二七林泰曾五〇林爽文四〇林得胜八五林富六〇林朝选二七、四九林寿图（颖叔）五、三九林维源二二林维让一九、二二、二六林福善五六枋山四五、五三枋山溪四四枋寮一九、二二、二四、四〇、四一、四五、五三、五五、五八、六九、七〇、七四枋桥二二武甲（番目）二六武腰社七五武暖社四七武黎社七五武毅军三八、六九、七一泗波澜七泗波峦四九法国（法兰西）二、一三、三六、五〇、六〇、六八直翟萨（洋师）五八直隶一〇、七二社番三一、四一社寮四三、四八、五四社寮社七五社总七二（参见总目）花旗（见美国）花莲港三四、四三、四六、四七、四八、五四、六二肥前八六虎门三九邵得胜六二、六三邵鉴清三六金川八金山三九金仔社七五金牌三九长夫一〇长江六一长门三九长崎七九、八一「长胜」（轮船）一、一三长发（太平天国）一三、四五、六九阿栽米息社四六、五一、五五、七四阿塔海八阿禄（番目）八一、八二、八三、八六阿养益社七四

九画保力庄一七、七八侯汝志三六俞大猷四、八前山三、五七、五九、六〇前学堂（船政）五〇勇二、三、四、六、九、一〇、一一、一三、一五、一六、一七、一八、一九、二〇、二一、二三、二五、二六、二七、二八、二九、三二、三三、三四、三六、三七、四一、四二、四三、四四、四五、四六、四八、四九、五〇、五一、五二、五三、五四、五九、六二南仔脚四八、五四南仔脚社七五南片社五三、七五南安三九南坑三五南投五四南洋（东南亚）三九、五五、五九南洋（中国东南各省）八、六〇南洋大臣六、一〇、一六、一八、五五南风澳一六南势社二六、四七、四九、七五南势湖四五、四六、四七、五一、五五、七〇、七一、七四南董的社七五南路五、七、一三、一六、一七、一九、二二、二三、二四、二六、二七、二八、三四、五八、五九、六一、七四、七五南澳一六、一七哈利孟二五威妥玛（Thomas Wade）二四、四〇、八五威达（见威妥玛）宣义营三七、四三、四七、六二客民七〇、七三客兵一五、二三客勇三一后山三、一二、一三、一七、三一、四六、五七、五九、六〇、六二、六三、六五、六六、六七、六八后学堂（船政）五〇后垄一四、二一、五六后湾一七、四一恒春四一挖土机五〇挖土机船三六昭忠祠三九「春日」（舰）七九星使（见沈葆楨）胡廷弼三二胡国恒三五、七二柳原前光（公使）一二、一六、一八、二二、二五、七九段起四五泉州一、二、六

、一〇、一三、一五、二六、三七、四一、四二、六五、七三洋人二五、三五、五六、六〇、六六、六七、六八洋工（见洋匠）洋火药四洋匠一八、二五、五八洋师四五、五八洋教习二五、三八洋务四五、五五、六八洋商六七、六八洋将一一、一三、一六、二六、三九、四五、五〇洋煤四、二五、三九洋枪四、二三、二五、二九、三七、三八洋枪队一六、一八、二九洋炮九、二三、二四、二五、二九、三八、六〇洪渭涛（参将）三三、四二洪（熙俦？）县丞四三胥吏五七疫（见疾疫）省、省会一、四、五、一三、四二、四九、五五、五七、六一、六二、六六（参见福州）红海三九红魁头五四美国四、七、八、二四、二五、六八、八〇范文虎八苗族八一茄鹿洞一九茄鹿塘二三茅埔四三、四八、五四茅埔社七五英吉利（见英国）英国二、六、一四、二四、三六、四〇、五〇、六〇、六二、六八、八五军火五军装一〇、五〇军机大臣八五酋长七四、七九、八〇、八一、八二、八三、八四、八五风口八一风水岭社七四风吹岭五二风港五、一二、一八、一九、二二、二三、三〇、三五、四〇、四五、五一、六九「飞云」（轮船）六、一一、一三、二四飞轮炮六香山五六香港三七

十画倭五、九、一二、一四、一六、一七、一八、二〇、二二、二三、二四、二五、二六、二八、二九、三〇、三五、三九、四〇、四一、四五、五五、五八、五九、六〇、六九、七〇（参见日本）倭奴四、五、三三凌定国二六、二九「凌风」（轮船）二四哥塞儿（见机慎）哥嘉（洋将）三九埔里五四埃及（E g y p t）三九袁闻柝（警斋）一八、一九、二三、二五、二六、二九、三四、三五、五四、五五夏献纶（筱涛）一二、一四、一五、一六、一七、二一、三二、三五、四〇、四一、四二、四九、五五、五八、六二孙开华（庚堂）六、一一、四一古宫岛七七射不力社五三、七四射麻哩社七五师周孔八七唐守赞（副将）三五、四九唐定奎（俊侯）一八、二五、三〇、三五、三八、四五、四六、五一、五二、五三、五五、六九、七〇、七一、七二、七四、七六徐仲眉七徐州一八、六九徐宜和三六徐万华三六恭亲王八五「振威」（轮船）一、二四旗后（旗后）二五、三五、五六、六九、七〇、七三时荣贵五〇晋笏（番目）五三根老邪社（见根老爷社）根老爷社四七、七五柴城一八海防四、一一、一四、三五、三八、三九、五五、五八、五九、六〇「海东云」（轮船）一「海镜」（轮船）二四浙江四、六五、六六烟六七烟台一八班兵三一、六一病疫（见疾疫）疾疫二〇、二五、二九、五四、五六、七一、七二、八六祝荣山三六秦龙标（游击）三三、四二料匠（见工匠）脂魁魁社四七、七五茶五六、六七草山社四六、五三、七一、七四荆州六一蚊蟀社八二、八五郡城（见台湾府）匪三五乌力烈（番目）五三马加银（副将）五一马尾一一、一八马达安社（见吗哒唵社）马邻四七高士佛社五、二二、八一、八二、八三、八六高士猾社（见高士佛社）「高尾」（舰）八一高登玉（提督）五四、五五

十一画乾隆六二参事院八六副岛种臣七八、七九商民五八崇武口二昆仑坳二五、二六、二九、三四、三五、五四、七五仑顶社四七、七五崩武社七五康熙三九、五六、六五麻哩吧社七五、八〇麻达简社三三、四一（参见斗史麻达简社）张天德四、

三五张光亮五一、五二、七一张同敞三九张其光（奎垣）（镇军）一六、一七、一九、二三、二五、二九、三四、五四、五五、七五张欣（都司）三四张斯桂一六张朝光（都司）三四张树声六张贤扶五一得其黎二八、四四、四六、四九、五四得其黎社七五望祖力一九、二六戚继光四、八教堂二四桶后社二七械斗五七梁鸣谦（礼堂）五、四三淡水一一、一二、一三、一八、一九、二一、二七、二八、三二、三七、五六、五七、六一深澳坑五八清（清国）七八、七九、八〇、八一、八二、八三、八四、八五（参见中国）清廷（见朝廷）清泉四五清港三五淮河六一淮勇四六淮军一〇、一九、二四、二五、三〇、三五、三八、四〇、四一、四五、五一、五三、五五、五六、五八、五九、六一、六九、七二、七四犁头店二猪勝索二二率芒社五三、五五、七四、七五琉球三、二二、二三、二五、七七、七八、七九、八二、八五、八六琅■〈王乔〉三、五、七、八、一二、一六、一八、二二、二三、二五、二九、三〇、三二、三五、四〇、四一、四五、五五、六八、六九、七〇、七三、七四、八〇、八一、八三理刘社四七、七五毕长和五二章高元五一、五二章坤五三符也冷烟（番目）八二符吻社三二、四七、七五扎厝三五船政（马尾船厂）五、一七、二四、三六、三八、四五、五〇、五六、六一荷兰三曹瑾四〇处雷（见取雷）通事二二、二六、三一、三二、四二、四三、四八、五四通商五六、五八、六〇、六六、六七、六八都（见北京）都布阿二五、三九郭占鳌一九、五三、七〇郭潜七八野艾（番目）五三野番三钓鱼屿七三陆心源（存斋）一八陈一鹤三九陈八宝（番目）二六陈光华一五、二一、二七、二八、三二、三三、四三陈兆翱五〇陈安生一八、二五陈有元五一、五二陈季同五〇陈阿三八二陈阿修社三四、七五陈新妇仔三五陈维礼四九、五〇陈辉（辉煌）一五、二七、二八、三一、三二、三三、三四、三七、四八顶城四八顶城社七五鸟枪三〇鹿耳门七三鹿儿岛七七鹿坡角一九鹿茸二二鹿港五八、六一梅崎八六

十二划傀仔角社八二冯安国二〇、三一、三二、三三、三六、三七、四一、四二、四四割番（见番割）博郎（税务司）一八、三九富绅（见绅士）富田二五彭城中平七、二二、二五遍仁岭一六、三二捻匪四五「扬武」（轮船）一、二、二四、四五斯恭塞格（L L D d e S e g o n z a c）一一、一二、一三、一四、一六曾元福（辑五）一七、一八、二三、三五、四〇曾捷春二七朝廷（清廷）三、四、二四、三六、三八、三九、五五、六九、七二、七四、八三极去枢中（？）五八「湄云」（轮船）一、二、二四湘军六九湖北六一、八一湖南五八湖广六七猴洞四一「琛航」（轮船）二四、六三华人五六番六、七、一三、一四、一七、一九、二〇、二一、二二、二三、二五、二六、二七、三〇、三三、三四、三六、三七、三八、四〇、四一、四三、四四、四六、四七、四八、四九、五一、五二、五三、五四、五五、五八、五九、六三、六六、六七、七〇、七一、七二、七三、七四、七五、七七、七八、七九、八二、八三、八四、八五、八六番目一八、一九、二〇、二三、二五、二六、三二、四二、四八、五三、六七、七四番地七九、八二、八三（参见番界、番境）番社五、七、一六、一七、一八、一九、二三、二六、二七、二九、三一、三二、三三、四〇、四一四三、四七、五三、五四、五五、五六、六〇、六八

、七〇、七五番俗八四番界六五（参见番地、番境）番酋五五、七一番割（割番）二二、二八、六七番境四二、五八、八四、八五（参见番地、番界番塾五三、七二皖（见安徽）答毕罕一五「筑波」（军舰）七八绅士一九、二二、二六、二七、三一、三二统领埔三五、八二、八五、八六粤勇二五、二九、三七粤寇（见长发）买远（番目）二三贵州六〇、六七、八一开山一四、一五、一六、二〇、二三、二六、二九、三三、三八、四〇、五九、六〇、七一开花弹五开花炮三三、四四、七一开禁四、一二、三八开路一九、二〇、二三、二六、三一、三二、三四、四六、四八、五一、五四、五七、五八、五九开辟二九、三三集一铺社七五集集街三五集集溪四八、五四隅眉坡四九云南六〇、六七、八一黄土才二〇、二六黄朋厚二六、三六、三八

十三划雍正五六传教六〇准部（准噶尔）八厦门三、五、六、七、九、一〇、一一、一二、一六、一八、二四、三〇、七九吗哒庵社（马达安社）四八、五四、七五塘坊五四妈仔后社七五妈梨也社五五、七四新也烟社七五爱知县八六新加坡六〇新竹五八新城二一、二七、二八、三一、三二、三三、三四、四二、四三、四七、四八、四九、五〇、五二、五四、五七、六二、六三新厝庄五四新街渡头二八暖暖五八杨士芳三九杨友旺七八杨占魁四五杨秀举四五杨阿和七八杨春荣四六杨飞高五二枫树岭三二溪头三三煤（土煤）一二、二一、二五、三六、三八、三九、五五、五六、五八、五九、六一、六六、七三楚军三八、六一狮头山二五、五二狮头社四〇、四四、四五、四六、五〇、五一、五二、五三、七〇、七一、七四猺（族）八一「靖远」（轮船）一、一三、二四笏朗（番目）五三绥靖（营）二三、三四绥远（营）一九、二〇、二七、二八、四二、四九、六二义学四九万安寨一八「万年清」（轮船）一、二四万国公法八一万嗣伯三六叶文澜五、二四叶阳春一四董成明八五董的社五三葫芦墩三五跳踊三二道光八、四〇、六五、七三乡团一七、一九邹祖寿（县丞）一五、二七铅弹二二、二八、二九电线五、九、一八

十四划台北一一、一四、二二、四九、五四、五六、五七、五八、六三、七三台北府五七、五八台协水师六二台东二九台南三、八、一二、一七、三五、四五、五五、六一、七二台湾二、四、五、六、七、九、一〇、一一、一二、一三、一四、一六、一七、一八、二一、二三、二四、二五、二九、三四、三五、三七、三八、三九、四〇、四一、四六、四九、五三、五五、五六、五七、五八、五九、六〇、六一、六二、六五、六六、六七、六八、六九、七〇、七二、七五、七七、七八、七九、八〇、八一、八三、八五台湾北路左营六二台湾府（郡城）五、九、一二、一三、一四、一六、一八、二四、二五、二九、三〇、三七、三八、三九、四一、五〇、五六、五八、六一、六二、七一、七八、八〇「台湾府志」一六嘉靖八嘉义九、一〇、一四、一九、二八、三九、五六、六一、六五嘉庆五六、六五嘉应州七三实仔八眼社四七、七五实仔眼四七、七五实空社四七实纪律社四二（参见斗史实纪律社）廖仕强八三廖有富二、三、一七、八三廖兴社四一彰化二、一〇、一四、一九、二八、三五、五六、五七、六一、六二、六五、七四、八三漳州四一、六五、

七三漳浦二汙尾一四、一八、一九、二一、二二、二六、二七四二、五六、五七、六一、六二汙尾关三三汙局一七汙海关二〇、四〇熊胆二二尔乃社八二、八三瑶歌社四七、七五琅■〈王乔〉（见琅■〈王乔〉）福州（省城）一、四、五、九、一八、三九、六五、七八（参见省、省会）「福星」（轮船）一、二、一五、二四、三三、四二、四三福岛九成（先锋）一二、三〇、八〇福康安四〇福清县一八福靖营二、五、一九、二七、三二、三八、六二、六九、七〇福锐营一六、五〇、五二、六二磁州五五纲砂八〇纲索社一二艋舺一四、二〇、二一、二六、三七、五六、五七、五八、六一语言（见言语）远望坑五六、五七、五八铭字营三八、四六、六九铭军（见铭字营）铜炮三三闽（福建）一、四、七、九、一一、三八、六〇、六五闽厂（见船政）饱干社四七、七五凤山一六、一七、一八、一九、二三、二五、二六、四〇、五五、五六、六六、六八、七〇、七一、七八凤皇山四八凤头鼻二六

十五划刘江四、八刘步蟾五〇刘登惠三六刘朝林五一刘璈（兰洲）一七、三〇、三九、四一、四五、五八刘韵珂（制军）六五审鹿社四八广东（粤、粤东）四、五、二三、二五、二九、三〇、三七、六五、八一、八六德勒塞（RETracey）四五德兰颀一三卫承元三六抚番一四、一五、二〇、二二、二九、四〇、五七、五八、五九、七二鲁富二五樟脑二三、五六、六六欧洲五〇潮州七三潮州庄一九澎湖九、一一、一三、一六、一八、二四、四五、六一、六九潘恭赞三九潘缔四〇潘爵（炜如）六、一一、一二、一三、一六、一七一八、一九、二三、二九、三〇、七四熟番二、三、六七、七〇、七五、八〇、八一、八三獐（族）八一瘟疫（见疾疫）缅甸八练勇一五、三七练营一一蔓东埔四八蔓东埔社七五蔡波五四蔡秉成五三蔡国祥四五蔡显老五四诸也葛三四、三五、五四、七五诸罗五六（参见嘉义）谈仔秉社四七、七五郑天保八六郑成功三九郑克塽七四郑荣二六、三〇郑经三九发逆（见长发）黎（族）七〇、八一黎兆棠（召民）五、一三、二〇、二三、二四、二九、三〇

十六划噶玛兰一二、一三、一五、一六、二〇、二二、二八、三一、三二、四二、四九、五六、五七、五八、六一、六五学官四一学政六二桦山资纪八三机慎（美国人）二五、八〇萨（萨摩）七九澳门六〇独水溪二八、三六兴化一五、六五暹逻三六靛五六头社仔五四头重溪五七头围一四、一五、一九鲍复康三五「龙骧」（铁甲船）七、八、七八龟山一二、一七、一八、二二、二三、三〇、三五、三七、八〇、八一、八二龟仔角六九龟仔角社五、一二龟仔笼藕社五五、七五龟■〈口女〉社四七、七五龟纹社四五、四六、五一、五二、五三、七四龟纹溪五一龟仑山五七龟潭湾一七

十七划徽州六一「济安」（轮船）一、二四磺六六总目五三（参见社总）总理各国事务衙门（总署）五、六、一〇、一三、二四、二五、二九、三〇、三二、五五、六七、六八、八五薄之社四三薄薄社四七、七五襄阳六一谢阿阁社五五、七五霜山五四、五九

十八划双溪一四、二六、三四、八六瞿式耜三九蓝鹿洲二簪文国（见日耳曼）镇海二「镇海」（轮船）二四镇海营二一、四五鸡笼一二、一三、一四、二一、二二、二七、四一、五六、五七、五八、六二、六三、六六、七三鸡笼坑二五额兵三八魏翰五〇鲤浪港四七鲫鲤潭社七五

十九划戴德祥（芝亭）（总兵）二、一七、一九、二七、二八、三二戴万生三九琼州七〇罗大春（景山）四、六、一一、一三、三八、七五罗大霖四一、四二罗晋卿四一艺童一三、四五、五〇药子（见子药）谭〔纶〕四鹊子埔四七二十划苏拉（番人）三四苏澳六、七、一一、一三、一四、一五、一七、二〇、二一、二七、三一、三三、三四、三七、四二、四六、四七、四九、五六、五七、五八、六三、六三苏澳社七五

二十一划炮台九、一二、一四、一六、一八、一九、二一、二二、二五、二六、二七、二九、三五、三八、三九、五〇、五九、六九、七〇兰军五四、五五铁五五、七三铁甲船（铁船、铁甲兵船）四、五、九、一七、二三、二四、三八、五五铁肋（船）三六「鳌」字营七〇

二十二划辟路二五

二十三划麟乐（社）一九

二十四划衢州四二盐六七

二十五划观音山五七